

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



AUTALAVOU



FEPUARI - IUNI

2025

TUSI AUTALAVOU – 2025

FEPUARI – IUNI

ASO SA – FEPUARI 02, 2025. “FA’ATALATALANOAGA I LE TUSI PAIA”

MATAUPU – “O LE FA’ATUATUA MA GALUEGA”

TUSI FAITAU – IAKOPO – 2: 14 – 26

“A o le fa’atuatua, o le fa’alagolago lea i mea ua fa’amoemoe i ai, o le mauiinoa lea o mea e lē o va’aia (Eperu – 11: 1). O le molimau a lakopo – E iloa le fa’atuatua i galuega, afai e fa’atuatua ae leai ni galuega, o le fa’atuatua lena ua mate. E leai se ola e maua ai.

FESOASOANI MO LE MATAUPU

O le tusi i lona aotelega, o lo’o fa’amamafa ai apoapoai fa’atamā mo le ‘au fa’atuatua, ina ia iloa le fa’atuatua i le onosa’i e tatali tigā o sauaga o lo’o faia ia i latou. Ia le gata i le va ma tagata sauā, ae ia iloa foi le fa’atuatua i le ola fealofani ma le fetausia’i o i latou lava i taimi uma.

1. O LE FA’ATUATUA MA GALUEGA (ff: 14 – 17)

O le isi lea fa’afitauli i le ola o tagata i le Atua. “o le fa’atuatua na o upu ae leai ni fa’atinoga.” Ua o’o lava i le tagata ua fia maua le fesoasoani, ua sulu atu i le mafatia, ae sau le tali, ‘Inā o ia outou ma le manuia, ia mafanafana ma ia mao’ona, a ua lē foa’i atu ia te i latou mea e tatau mo le tino.” Fai mai le fesili a lakopo; “O’u uso e, se a le aoga pe a fai mai se tasi ua ia te ia le fa’atuatua, ae le ia te ia galuega?”

FETUFA’AIGA:

1. O le a se manatu o le Autalavou i le fesili a lakopo ua aumai?, o le a se aoga o le fa’atuatua ae leai ni galuega?
2. O gafea o lenei olaga o lo’o tupu ai lenei ituaiga fa’atuatua, e fa’atuatua na o upu? Fa’ata’ita’iga: O taimi o si’i alofa i maliu ma so’o se fa’alavelave. E fa’aletonu loa ni mea e maua, po o le lē maua foi o se mea, tomumu loa ma fai tala o le fa’alavelave. A o le fesili, o le a le aoga o le si’i alofa?

2. O LE FA’ATUATUA E LEAI NI GALUEGA, O LE FA’ATUATUA UA MATE. (ff: 18 – 20)

O mea uma e mamate, e pei ona taua i le Tusi Paia, e lia’iina ma lafoai i le afi e mu ai.

FETUFA’AIGA;

1. O le a se manatu o le Autalavou, e sa’o lakopo pe leai?
2. E fa’afefea i latou e lē o faia ni galuega fa’ale – lotu?

FESOASOANI MO LE TA’ITA’I – (ff:21 – 26)

Ua toe fa’amanatu e lakopo galuega fai a Aperamo ma Ra’ava e saga fa’amautu ai le taua o le fa’atuatua ma galuega. O Aperamo na ia ofoina lona atalii o Isaako e fai ai le taulaga i le Alii. O le atalii e to’atasi, ae na lē avea lea ma ala e masalosalo ai le loto o Aperamo i le fetalai mai i ai o le Alii, e ave lona atalii mo le taulaga.

O Ra'ava o le fafine o nu'u ese, o le fafine talitane. Na fa'alogo i le mata'utia o Isaraelu ma lo latou Atua, ona fa'atuatua lea o lona loto ma tali leleia tagata o le Atua na asiasi atu i lona nu'u. O le fa'atuatua na fa'asaoina ai lona aiga atoa mai le taua ma Isaraelu.

FETUFA'AIGA: Ia fa'asoa le Autalavou i nisi o tala mai le Tusi Paia o lo'o iloa ai le fa'atuatua e ala i galuega fai.

UPU FA'AI'U

Ua fa'amanino e lakopo mo le 'au fa'atuatua o lo'o sauaina – e iloa le fa'atuatua i galuega. E leai se aoga e taulagi ai le fa'atuatua ma le talitonu i le Atua, ae lē o iloa i le olaga o aso uma. Ia amata mai le ola fetausia'i ma le alofa i tagata uma. Ia aua ne'i i ai se fa'ailoga tagata. Ia iloa le fa'atuatua e ala i le alofa atu i lē ua mo'omia le fesoasoani, ae lē na o upu ma tala.

O le isi lea mafua'aga o galuega fa'ale – lotu o lo'o faia i Ekalesia i nei aso, o le fa'ailoga o le fa'atuatua e ala i galuega. O lona uiga, afai e lē o faia ni galuega, po o le tau lē faia foi o ni galuega fa'ale – lotu, o le fua lena o le fa'atuatua o lo'o i lea tagata. Ae afai e galulue malosi ma fa'amalolosi i le tautua i le Talalelei ma le lotu, i so'o se ala, o le fa'ailoga foi lena o le fa'atuatua i le Atua. O le mea moni, e iloga lava i latou e lima malolosi ma i latou foi e ausage aiga. E lē iloa gatā foi le tagata e fa'atalalē ma fa'atu'utu'u i le lima vaivai ae lē galue. O i latou foi e taumafai lava mo se mea lelei, e iloga foi a latou galuega. O le fa'amanatu a lakopo, o le fa'atuatua e iloa i galuega, auā o le fa'atuatua na o upu, o le fa'atuatua lena ua mate.

GALUEGA FAATINO – FINAUGA (Debate)

1. Ia vaevae le Autalavou i vaega e 2. (Vaega Ioe ma le Vaega Leai)
2. Vaega IOE – FA'AMUAMUA LE LOTU.
3. Vaega TETE'E – FA'AMUAMUA LE AIGA.
4. Ia manino mafua'aga ma ni mau mai le Tusi Paia e lagolago ai le finauga a itu e 2.
5. Ia manino i folasaga a vaega uma le feso'ota'iga o le fa'atuatua ma galuega fa'ale – lotu.
6. Ia fa'aaoga le Tusi Faitau o le mataupuu, lakopo – 2: 14 – 26

FESILI MO LE FINAUGA –

1. O a galuega o le fa'atuatua? (o galuega lelei uma)
2. O se mea tatau le fai o ni galuega fa'ale – lotu pe leai? Fa'ata'ita'iga: faiga taulaga, sene, atina'e, alofa o le faifeau, ma isi lava galuega o lo'o taua ai le suafa o le Alii.
3. O nisi o lo'o manatu e tatau ona fa'amuamua le aiga, ae fa'amulimuli mea fai a le lotu, o le a se taofi o le Autalavou?

MANUIA TELE LE FETUFA'AIGA I LENEI AFIAFI

////////////////////////////////////

**ASO SA – FEPUARI 09, 2025. “FA’ATALATALANOAGA”
MATAUPU – “IA MATUĀ NAUNAU E USITA’I I FAUTUAGA LELEI”**

FA’ATOMUAGA – E taua fautuaga i le olaga tuputupu a’e o le tama ma le teine talavou. Ae sili ai ona taua o le iloa o le ituaiga fautuaga e tatau ona fa’alogo ma usita’i i ai. O nei aso, ua matauina le felanulanua’i o fautuaga eseese o lo’o fa’alogo pea i ai taliga. E iai fautuaga e lelei ma manuia ai. E i ai foi fautuaga e matuā manino lava le leai o se mea lelei e maua mai ai. O nisi foi fautuaga e foliga e lelei ma manaia le fa’auupuina po’o le mafua’aga, ae mulimuli mai ai le fa’alumaina.

FESOASOANI MO LE MATAUPU ;

E lē taumate le i’u lelei o le talavou e fa’alogo ma usitai i fautuaga lelei, a o le tagata e lē fa’alogo i le fautuaga lelei, ae talia le fautuaga lē lelei, e i’u i le malaia ma le fa’afanoga.

FESILI: E FA’APEFEA ONA ILOA LE FAUTUAGA LELEI MA LE FAUTUAGA LE LELEI?

O fautuaga lelei, o fautuaga e maua ai le poto ma le atamai. (ethical values)

1. ESOTO – 18: 13 – 27

O le avea o Mose ma ta’ita’i o le nu’u o le Atua ma le faigamalaga, e lē o se galuega e faigofie. E lē gata e faigatā loto o tagata ae e tele foi nafa fa’atino o lea aso ma lea aso. O se galuega na iloga na vaivai ai Mose, ona o le taumafai lava e fai na o ia le galuega. A’o le fautuaga lea a letero na ave ia Mose. Ia filifili nisi o le nu’u e fesoasoani ia te ia. Ia filifilif ni tagata loto tetele, matata’u i le Atua, fa’amaoni, ma ni tagata e inoino i le ola manumanu. (ff: 21 – 23). O ituaiga tagata ia ua manatu letero e tatau ona fesoasoani ia Mose. O se fautuaga na talia lelei e Mose ma fa’ataunu’u ai lana galuega fa’ata’ita’i.

O le fa’alogo i le fautuaga lelei, e maua ai le malosia fa’asili e fa’atino ai le vala’auina. O nei aso, e to’atele ta’ita’i ua vala’auina i so’o se auaunaga, latou te lē talia fautuaga fa’apenei, ona o le naunau i le pule ma le tamāoaiga. Ae galo ai, le ta’ape o le galuega ma fa’atupu ma’i ia te ia o le ta’ita’i.

2. KENESE – 27: 41 – 46

O le tala i le fautuaga a Repeka ia lakopo ina ia alu ese ma le aiga ona ua ita Esau lona uso matua i le tofi. O le usita’i o lakopo i le fautuaga a lona tinā, na fai ma ala o le iloa o isi mea lelei -

1. Ua maua le filemu i le loto o Esau.
2. Na iloa ai le Atua e ala i fa’aaliga – Kenese – 28: 10 – 22/ 32: 25 – 32
3. Ua maua lana fanau ma ua fai ma tupu’aga o le nu’u filifilia o le Atua. (Kenese – 29: 15 – 30: 24)
4. Maua mafaufauga lelei auā se leleiga ma lona uso o Esau. (Kenese – 33)

O fa'amanuiaga e pei ona maua e lakopo ona o le fa'alogo ma usita'i i lona tinā, o fa'amanuiaga foi ia tatou te maua pe afai tatou te pei o lakopo. O le fautuaga e le'i te'ena pe na fesiligia e lakopo. Ae na tula'i lava ma fa'atino, lea ua taunu'u i le manuia. O le fa'alogo ma usita'i o lakopo i le fautua a lona tinā, na maua ai isi fa'amanuiaga e tele i lona olaga. O le fa'alogo ma usita'i i le fautua mai o matua e maua ai fa'amanuiaga mai le Atua.

3. NUMERA – 13: 26 – 33

O fautuaga a Kalepo ia Mose ma le nu'u o le Atua, ina ia lototetele ma fa'amalolosi e aga'i pea i luma e tau ma Kanana, ina ia maua lo latou tofi e pei ona folafola mai e le Atua. O Kalepo o le tasi o tagata asiasi (spies) i le nu'u o Kanana. O le foi ane o tagata asiasi na filifilia e Mose, na latou fa'ailoa ai le malolosi o Kanana ma ona tagata. Na latou fautuaina Mose ma le nu'u ia aua ne'i o'o atu i Kanana ona o tagata malolosi i latou o lo'o nonofo ai. (ff: 26 – 33). Peita'i, o Kalepo na ia vavao le nu'u ma fautua atu, ***“Se'i tatou matuā o a'e lava i ai, ma fai ai mo i tatou, auā e mafai lava ona tatou manumalo ai”*** O le fa'amalosi ma le fa'alaei – 'au a le tagata fa'atuatua i le mana o le Atua e mafaia ai so'o se mea. O se fautuaga na logo lelei i taliga o Mose ma le nu'u ma fa'aauau ai pea le savaliga ma taunu'u i Kanana i le nu'u folafolaina. O le fa'alogo ma usita'i i fautuaga lelei, e taunu'u lelei ai fa'amoemoega ua leva ona tautigā ai. O nei aso, e fa'avaivaia a isi tagata, ona o le fautua fa'avaivai ane o isi tagata, Ae afai e maua ni tagata e pei o Kalepo i totonu o aiga, nu'u ma Autalavou, e mautinoa foi o le a taulau o so o se fa'amoemoega o lo'o fuafuaina.

1. NISI FAUTUAGA E TATAU ONA MAFAUFAU TOTO'A I AI.

(a) O LE FAUTUAGA A APISAI IA TAVITA INA IA FASIOTIA SAULO (I Samuelu – 26: 6 – 11)

O Apisai, o le tama a Seruia le tuafafine o Tavita. O le fautua ane o Apisai ia Tavita e fa'ao'o le oti ia Saulo, o se fautuaga e mafua i lona manatu e tau le leaga ona o Saulo ma lona taumafai e fasiotia Tavita lona uncle. Peita'i, o se fautuaga e le'i taliaina e Tavita, fai mai upu a Tavita, ***“Aua e te fasioti ia te ia, auā po o ai ea na te fa'ao'o lona lima i e ua fa'au'uina e le Alii, ae e lē nofo sala ai o ia”*** O le fautuaga a Apisai, e mafai ona sa'o pe lelei i le tatou fa'alogo, ona o so'otaga fa'ale -aiga, peita'i, e lē lelei lona taunu'uga, o le fa'aiuga ua fai e Tavita, o se fa'aiuga ua tonu ma sa'o atoatoa. Ua fa'asili ai le mata'u i le Atua ma ana tofiga i lo le tau ma sui.

(e) O LE FAUTUAGA A LE TO'ALUA O IOPU INA IA FAIFAI I LE Atua (Iopu – 2: 9 – 10)

O le talitonuga a le avā a Iopu, o le ma'i papala e mafua ina ua to'asā le Atua. Ua lē alofa mai le Atua. O lona uiga, e lē tatau foi ona toe fa'atuatua Iopu i lona Atua. O le fautuaga e mafua i mea ua talitonu ma va'ai i ai. Peita'i, e lē o le mafua'aga lea o le ma'i o Iopu. E pei ona fa'amauiaina, o le ma'i o Iopu o se tofotofoga i lona ola fa'atuatua. Na manumalo Iopu ina ua ia te'ena fautuaga

mai lona to'alua ma ana uo. O le fa'aiuga o le tala, na fa'aluaaina e le Atua manuia o lopusi mai manuia na to'esea.

UPU FA'AIU – E iai le talitonuga, o lo'o fa'alogoaina ituaiga fautuaga nei i lo tatou si'osi'omaga. O fautuaga e fa'avae i talitonuga masani aemaise o le va'aiga o mata. E i ai foi fautuaga e faia ona o le ita – pei o Apisai, peita'i, o ia ituaiga fautuaga e lē maua ai se filemu. O fautuaga e peiseai o le ā fa'atupu ai le vevesi i luga o le isi vevesi. A'o le mau a le atunu'u, ***E lē aoga le fa'ataumatatao auā na o taua ma misa e maua ia. O la le Tusi, o le tali filemu e liliueseina ai le ita.*** O lona uiga e lē aoga ia ituaiga fautuaga. Ae tataua ona saili i ni auala filemu pe afai e saili se tali o fa'afitauli.

GALUEGA FA'ATINO –

1. O le a se aoga o fautuaga i lou olaga Talavou?
2. E fa'apefea ona iloa fautuaga lelei ma fautuaga lē lelei?
3. O a ni a'afiaga o le fa'alogo i fautuaga lelei, ma ni a'afiaga o le te'ena o fautuaga lelei?
4. O a ni a'afiaaga o le fa'alogo i fautuaga lē lelei?
5. O le a se mea e ao ona tatou faia pe afai ua te'ena le fautuaga lelei, ae talia le fautuaga lē lelei?

AOTELEGA O LE MATAUPU –

O le fa'alogo i fautuaga lelei, tatou te lelei ai. A o le fa'alogo i fautuaga lē lelei, e i'u ai i le fa'afanoga ma le malaia e lē fia manatuaina. Tupulaga, mafaufau toto'a i au fa'ai'uga e faia, aua le fa'alogo i le fautuaga leaga tatou te leaga uma ai.

MANUIA LE FETUFAAIGA I LENEI AFIIFI, MALO LE ONOSAI



ASO SA – FEPUARI 16, 2023 “ FETUFA'AIGA FA'ALE AGAGA”

MATAUPU – “O LE SAPATI MO LE LAUELEELE”

TUSI FAITAU – LEVITIKO – 25: 1 – 7

UPU TOMUA – “E taua le galulue ma malōlō” – E lē o le malōlō ua leai se galuega e toe faia po'o se isi lava mea aoga, ae o le malōlō e saili se isi malosi fa'asili auā galuega fa'atino ma fa'aaauu. E fa'apena foi le si'osi'omaga , e tataua ona i ai ni aso po'o ni tausaga e malōlō ai se'i fa'atuputeleina ni minerale mo le ola lelei o la'au, o manu, aemaise lava le tagata.

FESOASOANI MO LE MATAUPU –

1. O LE A UIGA O LE UPU SAPATI?

O le sapati i le gagana Eperu, o le “taofi” po o le “cease” i le fa'aperetania. I le tala o le foafoaga, e 6 aso na galue ai le Atua, ae na taofi galuega uma i le aso fitu (7), ae malōlō ai.

2. O LE SAPATI E FAI MA ASO TAPUA'I –

I le Tusi Paia o le aso lona fitu o le vaiaso e tataua ona fai ma sapati. (Aso To'onai) i le taimi nei. Peita'i, ua fa'amamaluina e le EFKAS ma le tele o tapuaiga Kerisiano le Aso Sa

e fai ma aso tapua'i i le Atua, "ona o le Aso o le Toetu o Iesu Keriso" O le aso na toe soifua manumalo ai Iesu Keriso le Ao o Ekalesia mai le oti ma le tu'ugamau, A'o le aso to'ona'i, o le aso lea na i ai Iesu i le tu'ugamau.

3. *"O le talitonuga o le 'au Kerisiano, o i tatou o tagata o le Ekalesia Manumalo a Keriso, o le mea lea ua alaga tatau ai le fa'amamalu o le Aso Sa. E le gata e malōlō ai i feau masani o le vaiaso, a o se aso e mafaufau atili ai i le alofa tunoa o le Atua, na malii ai ma toe soifua manumalo ona o le fa'aolataga mo i tatou uma. O le Sapati la, ole Aso o le aso tapuai I le Alii."*

ESOTO – 20: 8 – O lo'o fa'amatala ai le fa'amamaluina o le sapati i le Feagaiga Tuai. O lo'o fa'amamaluina ai le taofi o galuega uma. O galuega e aofia ai ma galuega alofa. Ua fa'amonía lea i le finauga i le lē fiafia o le 'au Faresaio ia Iesu i le faia o fa'amalōlōga i le Sapati. (Mareko – 1: 29 – 31, 3: 1 – 6, Luka – 13: 10 – 17, Ioane – 9: 1 – 16, ma isi).

I le manatu o le 'au Faresaio, e o'o lava i galuega alofa – e pei o fa'amalōlōga ma isi, e tatau lava ona taofi (cease) i le sapati. Fetalai Iesu, o galuega uma e taofi, ae tau lava o galuega alofa, galuega fesoasoani i nisi ua mafatia le ola, e tatau lava ona faia pea. Fetalai Iesu i le 'au Faresaio ma le 'au Tusiupu, **"Ua faia le Sapati mo tagata, a ua le faia tagata mo le Sapati"** (Mareko – 2: 27). Ua fa'amanino e Iesu, na fuafuaina mo le fa'afouina fa'ale – Agaga o le tagata mo le Atua ma isi galuega fa'aauau. Peita'i, ua matauina le avea o le Sapati ma avega mamafa i nisi o tagata, ona o tulafono Fa'a – lutaia. O tulafono ua faia ina ia fa'amalie le mana'o fa'ale- tagata ae lē o le Sapati i lona fa'amamaluina. E ui i le 'ese'esega o aso ua fa'amamaluina ai le Sapati i nei aso, peita'i, o lo'o tumau lava le uiga moni o le Sapati – **"o le malōlō ma mafaufau i le alofa o le Atua"**

O LE SAPATI MO LE LAU'ELE'ELE - (Levitiko – 25: 1 – 7)

O le fa'atonuga mai le Atua mo Isaraelu e taua mai ia Mose lana auauna, ina ia fai le Sapati mo le lau'ele'ele pe afai e taunu'u i Kanana ma galulue ai. O lo o manino i le tusi faitau aiaiga o le fa'amamaluina o le Sapati mo le lau'ele'ele. **1.** E ono tausaga e te lūlū ai saito i lou fanua ma e teuteu ai lou tovine (f: 3). **2.** A o le fitu o tausaga, e fai ma Sapati lea e mapu ai le lau'ele'ele, o le sapati i le Alii, aua foi e te lūlū ai ni saito i lou fanua, aua foi e te teuteu ai lou tovine. O a mea ua maua i le fanua, ia 'ai ma fa'aaoga, ae aua ne'i toe faia ai se galuega.

(f: 4). Sapati i le Alii... O lo'o taua i le fuaiupu muamua, o le sapati mo le lau'ele'ele e fai pe afai e taunu'u ma galulue i laufanua o Kanana.

"O le faia o le sapati, o se avanoa e malōlō ai le galueaina o le fanua, ae tau o le a'ai ma fa'aaoga fua o le laueleele (f: 6 – 7). O le malōlō e lē gata i le a'ai ma fa'aaoga fua o le lau'ele'ele, ae o se avanoa taua lea e mafaufau loloto ai Isaraelu i le alofa o le Atua, na afua ai ona selesela ma 'oa'oa i manuia o ia laufanua – auā e lē o ni o latou lau'ele'ele mai le amataga, peita'i, ua maua ma fa'aogaina ona o le alofa o le Atua. O se faiga ua alagā tatau ma fetai lelei i le soifuaga o Isaraelu, ina ia i ai se vaipanoa o le olaga e toe manatua ai le alofa o le Atua na amata mea i le maua o lau'ele'ele. Ina ne'i mea ane ua na o le sapi ma fa'aaoga fua o le lau'ele'ele, ae galo ai le fa'afetai i le Atua, o Lē na aumaia ia manuia mo i latou."

O LE A SE TAU A O LE SAPATI MO LE LAU'ELE'ELE MA TAGATA GALULUE.?

Mo i tatou i le lalolagi lenei, e taua le sapatu mo le lau'ele'ele ina ia –

- Fa'afouina ai le tamāoaiga – minerale mo le ola lelei o la'au ma manu, ina ia aoga mo le tagata soifua.
- E toe mafaufau ai le tagata i nisi auala e toe fa'alelei ai le lau'ele'ele
 - Fa'aitiitia le fa'aaogaina o vaila'au o'ona ae taumafai e sasa le vao pe vele foi.
 - Fa'aleleia vaega o maua ai se suavai i fanua ma isi auala e fa'aleleia ai le lau'ele'ele.
 - Toe totō nisi la'au ma le vao pe afai ua fa'atamaia i fa'atoaga ma lafu manu i aso ua mavae.

“A o le fa'asilisili o ia mea uma, o le malōlō ma mafaufau i le alofa o le Atua ua maua ai fa'amanuiaga e tele mai le lau'ele'ele.

O AI E PULE I LE SI'OSI'OMAGA?

E pule aoao lava le Atua i mea uma o le foafoaga e pei ona iloa i le tala o le foafoaga.

(Kenese –1&2). Ina ua uma ona faia o mea uma, ona faia lea o le tagata i le fa'atusa o le Alii ma tu'u i ai le pule ina ia fa'aaoga ma tausi lelei le foafoaga. *O le upu pule i le gagana fa'a – Eperu, o le radah, o lona uiga, o le nofotupu pe manumalo. O le finagalo o le Atua, ia tulaga ese le tagata mai mea uma o le foafoaga. Peita'i, o le pule ua tu'uina i le tagata, o le pule e tausi mea fa'atasi ai ma le Atua i le ta'ita'iga a le Atua. O nei aso ua tele ina fa'aaoga sesē ma fa'auiga sesē le upu pule. Ua fa'auiga i se tulaga ua so'ona fai ai le si'osi'omaga e pei o se malae o lo o tau ai se taua (battlefield). Peita'i, e lē se finagalo lea o le Atua mo le si'osi'omaga, o le pule ua tu'uina ia i tatou, o le pule e tausi ma le alofa, e pei ona tu'uina mai e le Atua o le alofa ia i tatou. O le pule e tausi lelei ma fa'aaoga tatau le si'osi'omaga ua aumai mo le manuia o le ola o le tagata, ae lē o le ola fia pule ai.*

GALUEGA FAATINO.

1. O le a se taua o le Sapatu mo le lau'ele'ele ma tagata galulue?
2. Ia fa'asoa le Autalavou i nisi o fa'alavelave ogaoga o lo o tutupu i le si'osi'omaga i nei aso pe aisea? Fa'ata'ita'iga: afi i togavao, galulolo ma tafega, palapala solo ma isi.
3. **Ua tele pea finauga i nei aso po'o le fea le Sapatu sa'o, o le a sou taofi fa'atalavou o le EFKAS?** *“O le fesoasoani, tatou te lē fia faia ni finauga i ia taofi, ae ia fesoasoani le mataupu o lenei afaiafi mo i tatou uma, O tatou tatou te tapua'i i le Atua manumalo, ae lē o se lesu o lo'o i le tu'ugamau e le i toetu.”*

UPU FA'AI'U –

Ia tausi lelei le si'osi'omaga ma aua le manatu māmā i lona fa'aaogaina. Ia pule ma le alofa ae le o le fa'asausili ma le fa'amaualuga. Ia tausi le sapatu mo le lau'ele'ele ma mafaufau i le alofa o le Atua, ia tapua'i foi i le sapatu ua taofia ai galuega ae malōlō ma mafaufau i le fa'aolataga o le alofa o le Atua mo le tagata, e ala i lona toetu mai le oti.

IA MANUIA LE FETUFA'AIGA I LENEI AFIAFI, FA'AFETAI LE FA'AMALOLOSII

////////////////////////////////////

ASO SA – FEPUARI 23, 2025 “SU’ESU’EGA I TUSI PAIA”
MATAUPU – “TATOU TE MAPU MA FILEMU I A’AO O LE ATUA”
TUSI FAITAU – KENESE 8: 8 – 14

UPU AMATA – E lē taumate le tele o fa’afitauli ma faigata o lo’o fesouaina ai le soifuaga fa’ale – fa’atuatua o lo’o tatou i ai. O le mataupu o lenei afiafi, o le saga fa’amanatu mo tupulaga i le soifua tautua ina ia tatou mapu ma to’a pea i a’ao o le Atua i taimi uma. O a faigata, o le sologa lelei foi o le olaga, o le Atua lava i ona a’ao agalelei tele, tatou te malōlō ma filemu ai.

FESOASOANI MO LE MATAUPU – Kenese – 8: 14.

“A ua lē maua e le lupe se mea e mapu ai ona vae, ona toe foi mai lea o ia iā te ia i le va’a, (ark), auā sa i ai le vai i le fogāelele uma, ona a’apa atu lea o lona lima, ma tago i ai, ma aumai ia te ia i le va’a.”

Ua filifilia le tala ia Noa ma le lupe e saga fa’amautu ai le tatau ona tatou matuā foi i le Atua, ma tumau ai, auā tatou te mapu ma filemu ai e lē gata o le tino, a o le mafaufau ma le agaga.

O i tatou o lupe fa’alele a le Atua mo lana feau ma le galuega. A o le mea mautinoa lava, e lē ‘asa leni soifuaga ma ni mau fa’afitauli. E moni e tele auaunaga e maua ai le mapusaga, peita’i, o le foi lava i le Atua, o le mea e tatau lava ona tatou faia.

- O le ark, i nisi o tala o le Tusi Paia, e fa’asino foi i le Ato La’au a le Atua. (Esoto – 37). O le fa’ailoga o le Atua auai ia Isaraelu a’o i ai i le Esoto mo le 40 tausaga. O le Ato La’au e Paia ma Mamalu (I Samuelu – 6). I le Eperu – 9:1 – 4, o lo’o taua ai vaega o lo o i totonu o le Ato La’au a le Atua. I nisi o fa’amaumauga, o lo’o taua ai papa ma’a o lo’o tusia ai ituaiga e sefulu lua o Isaraelu, sa i totonu foi o le atola’au.
- O lona uiga, e mafai foi ona tatou fa’auiga le va’a na fausia e Noa, o le Ato La’au a le Atua. O le va’a la (ark), na fai ma fa’ailoga o le Atua auai i le lalolagi, e ui i lona to’asā ona o le agasala a tagata. O le fa’ailoga o le Atua na te lē tu’ulafoa’i mai i taimi o faigata e pei o le tala ia Noa ma le lolo.
- O le foi la i le va’a, o le foi lava lea i le Atua. O le fa’aloaloa mai o lima o Noa, o le tala fa’atusa lea o le Atua i ona a’ao e fa’aloaloa mai pe a tatou sulufa’i atu ma le fa’atuatua mo se fesoasoani.
- I le fuaiupu e 10, *“ona toe fa’atalitali lea o ia i nisi aso e fitu, ona toe tu’uina atu lea e ia le lupe ai le va’a.”*
 - O le numera 7 – o le numera atoatoa i le faitauga fa’a-lutaia. O le mapu i a’ao o le Atua, e toe fa’aatoatoa ma fa’afouina ai le malosi fa’ale-tino, mafaufau ma le agaga, e toe fa’aaau ai feau ma le galuega..
- I le fuaiupu e 11, *“ua toe foi mai ia te ia o le lupe i le afiafi, fa’auta foi oi lona gutu le lau olive mata. Afiafi – ua uma le aso – taeao ma le afiafi – o le aso atoa. Lau olive mata – o le fa’ailoga o le ola ua o’o mai i le lalolagi, ina ua tuana’i le lolo.*

- *O le toe foi a le lupe, o le toe foi e ta’u atu ia Noa, ua maua lona mapusaga. Ua mauiua le ola ua ia maua. E tatau ona tatou toe foi i le Atua ma le loto fa’afetai, pe afai e maua le mapusaga ma maua le ola.*
- I le fuaiupu 12, “Ona toe fa’atalitali lea o ia i nisi aso e fitu, ona tu’uina atu lea e ia le lupe, a ua lē toe foi mai lava ia iā te ia.”
 - *O le toe foi e ave le fa’afetai i le Atua, e saga fa’atupuina ai le malosi ma fa’ateleina ai fa’amanuiaga e maua mai le Atua. O le lē toe foi o le lupe, o le fa’ailoga ua mauiua lona saogalemu. Peita’i, e lē tatau ona galo i le tagata sa’oloto le alofa o le Atua. Afai o lelei ma saogalemu mea uma, ia fai ma le fa’aeteete auā o manuia na maua mai le Atua. Ia aua nei galo le Atua o lo o fa’atalitali mai. O le a lava le taimi e mo’omia ai le fesoasoani, foi i le va’a ma le fa’atuatua, o lo o fa’aloaloa mai a’ao o le Atua tatou te mapu ma filemu ai.*

2. E FA’APEFEA ONA TATOU ILOA A’AO O LE ATUA I LE LALOLAGI LENEI?

E iai auaunaga o lo’o maua ai le mapusaga o le tagata mafatia i le olaga nei e pei o –

- Falemai ma taulasea ----- fofō o gasegase eseese
- Leoleo -----fesoasoani i taimi o fa’alavelave
- Faletupe (fale loan) ----- pe a mo’omia se tupe
- Fono a le nu’u ----- fa’afitauli lotoifale o le nu’u
- Ofisa o Faamasinoga -----solitulafono, fanua, ma suafa matai
- Faifeau -----Fa’afitauli fa’ale- agaga o aso uma
- Aiga – matua – to’alua -----Fa’afitauli o le lotoifale o aiga
- Uo – best friend -----Fa’asoa i ai faafitauli o aso uma
- Ofisa o aoga ----- poto a’oa’oina o aso uma
- Fale o matai/ faifeau ----- a’oa’oina i tu ma agai fanua
- Ma isi auaunaga e tele o le a fa’ailoa ane e le Autalavou.

O nisi ia o auaunaga eseese ma isi ua lē taua, o lo’o auala mai ai a’ao fa’amalōlō ma a’ao lavea’i o le Atua mo i tatou pe a mo’omia le fesoasoani. O auaunaga o lo’o galulue ai i latou ua maua le tomai mai le Atua, auā se tali atu i fa’afitauli eseese o le olaga. O le tatou lava galuega e fai, o le saili i ai ma le fa’atuatua. Saili ma tatalo i le Atua na te saunia ma fa’afaigofie auala e maua ai lo tatou mapusaga. Mo i latou o lo’o i ai le taleni o auaunaga fa’apenei, e taua le fa’amaoni, ma ia fa’aaoga tatau taleni mai le Atua.

GALUEGA FAATINO –

1. O a mafatiaga e mafai ona maua se mapusaga mai auaunaga eseese nei?
2. O le a se feso’otaiga o auaunaga ua taua i luga ma le Mapu i a’ao o le Atua?
3. Fa’amata e mafai ona avea oe ma talavou e mapu iai mafatiaga o nisi tupulaga ua mafatia ma pologa i faiga a le tiapolo i nei aso? Fa’apefea ona fa’aloaloa atu i ai ou lima ia i latou?
4. Fa’aiu i se saunoaga a lau Susuga a le Ta’ita’i e aofa’i ai le mataupu.

MANUIA LE FELAFOLAFOAIGA I LENEI AFIIFI.



ASO SA – MATI 02, 2025. “ FA’ATALATALANOAGA”

MATAUPU – “O LE TUSI PAIA MA FAIGA PALOTA”

SINI – ‘Ia mafai na fa’asoa tupulaga ia i ai se silafia i faiga palota ma so latou iloa fa’ale Tusi Paia, auā o le gasologa lea o le olaga o lo’o soifua ai pe a o’o ina sailia ta’ita’i o le malo.

UPU TOMUA – Ua ma’ea atu faiga palota ma filifiliga a le tatou atun’uu i le sailia o ona ta’ita’i mo le isi lua tausaga ma le fa tausaga o lumanai. Fa’afetai ai i le Atua ina ua saogalemu lea fa’amoemoe talosia o le atunu’u e pei ona masani ai. O faiga lava ia o malo temokalasi e fa’aali lava le aiā tatau a le tagata lava ia i lana filifiliga sa’oloto mo le na te lagolagoina. Ua fa’amamafa lava e le ‘au toeaiina a le tatou Ekalesia le ‘aufaigaluega Faifeau ina ia matuā ‘alo’alo ‘ese mai le auai i fa’atosina ma polokiki a i latou e tauva. A’o le tatou galuega o le fa’amafanafana ma talosia le manuia o gasologa o fa’amoemoe o le malo.

Ua o’u manatu e lelei foi ona fa’asoa ma tupulaga i nisi o faiga palota mai le Tusi Paia auā le aga’i atu i le lumana’i, auā ua maitauina le aga’i foi o talavou a le tatou Ekalesia i ia foi tofiga o le malo . O se mea fiafia lea ma le fa’afetai ai i le Atua. O faiga palota, o se avanoa taua e filifili toto’a ai ni ta’ita’i o le atunu’u mo gasologa i le lumana’i. O le mea mautinoa lava, a lelei ona filifili ni ta’ita’i o se atunu’u, ua lelei foi gasologa o atina’e ma le ola o tagata i totonu o se atunu’u. O le tatou mataupu la i le nei Aso Sa, o le a tatou fa’asoa ai i nisi o faiga palota po o filifiliga o lo’o taua i le Tusi Paia.

FESOASOANI MO LE TA’ITA’I –

1. **IEFATA** – O lefata o le tama na tu’ulafoa’ina e ona tagata ma ona tupu’aga, peita’i, ua toe a’ami e le nu’u e fai ma ta’ita’i i le taua ma Amoni. Na i’u manuia le ta’ita’iga a lefata ona o le Atua na fesoasoani ia te ia (Fa’amasino – 11). O le olaga lenei, e tau lē amanaia tagata fa’apei o lefata, tagata ua tu’ulafoaina ona o ni mafua’aga ua manatu isi tagata e sa’o. Peita’i, o tagata ia e mafai ona ui mai ai le finagalo o le Atua e fai ma ta’ita’i lelei mo le manuia o tagata.
2. **SAULO** – O le filifiliga ma le mana’o o Isaraelu, na latou filifili ai ma palota e avea Saulo ma tupu ma fa’amasino ia te i latou, ia muamua foi le tupu i o latou luma i le taimi o taua ma isi malo. O se filifiliga na faia ai le Atua i o latou manatu. (I Samuelu – 8: 19 – 22). O Saulo pe a fa’amatalaina, o se taule’ale’a ‘aulelei toe maualuga, e leai se tagata o le fanauga a Isaraelu e sili ona ‘aulelei ia te ia, e gata ifo I ona tau’au le maualuga o le nu’u uma. (I Samuelu – 9:1 – 2)

O Saulo o le tupu muamua lea o Isaraelu, ina ua fa’avae lona malo. E lē o se galuega e faigofie le ta’ita’iga fa’atupu i se taimi muamua. E tele faigata ma fitā, aemaise o le taimi lea o lo’o avea Samuelu ma ta’ita’i o le nu’u, ina ua maliliu Eli ma lana fanau. O se ta’ita’iga e tele ona vaivaiga e pei ona fa’aigoaina. O le tagata e lē faalogo i le Atua. Peita’i, o le maliu o Saulo o lo’o viia e le to’atele o tagata, ona o le tupu na maliu i le taua. E maliu lava o lo’o faia lona tiute, o le muamua i luma o le taua ma isi malo. E manaomia tele ni ta’ita’i pei o Saulo le saili malo, e oti lava i le fa’atinoga o ona tiute mo tagata o le malo , ae lē mo ia ma lona aiga.

3. **TAVITA** – E to’afitu le fanau a lese e pei ona taua i le tala. O tama matutua o tagata tino maualuluga ma malolosi. Peita’i, e le’i filifilia i latou e le Atua. Ua manino le fetalaiga a le

Atua ia Samuelu, **“Auā e lē va’ai le Alii pei o le va’ai a tagata, auā e va’ai tagata i le tino, ae va’ai le Alii i le loto.”** Mai le to’atele o uso tino laulauā ma le malolosi, na filifilia e le Atua le ui’i o le fanauga, ona o lona loto.

E mo’omia ni ta’ita’i fa’apei o Tavita, e lototele ma le loto malosi e faia o mea lelei. E ui lava na paū maulalo ona o le agasala ia Patisepa, peita’i, na toe timata le upega, salamō, ma fa’aauau ona tiute fa’atupu seia o’o ina oti.

4. SAULO – PAULO – (Galuega – 9)

O Saulo o le tagata fa’amaoni i lona talitonuga fa’a-lutaia. O lona fa’amaoni lea na afua ai ona saili e saisai le ‘au Kerisiano. Peita’i, o inā na filifilia ma vala’auina ai e le Atua i le ala i Tamaseko ma avea ai ma tagata fa’amaoni i lona talitonuga fa’a-kerisiano e o’o mai i nei aso. E mo’omia e le Atua ni ta’ita’i fa’amaoni. O le fa’amaoni e faia ai galuega lelei mo isi ae lē mo na o ia ma lona manuia. O ta’ita’i fa’amaoni, e lē femoumoua’i ma fa’alotolotolua, ae finau fa’atasi i le ta’ita’iga a le Atua.

GALUEGA FA’ATINO –

- Ia filifili ni ta’ita’i o lo’o taua i le Tusi Paia ma fa’asoa i auala na filifilia ai i latou e fai ma ta’ita’i. O a ni a’oa’oga mo tupulaga mai ia i latou na?
- O le a se taua o le mataupu ia te oe le talavou ua i ai lou sao i le filifiliga o ta’ita’i o le atunu’u?
- E fa’apefea ona e iloa ni ta’ita’i ua filifilia e le Atua, ma ni ta’ita’i na filifilia e le fa’atosina ma le mana’o o tagata?
- Fa’apefea ona e sauni e avea oe ma ta’ita’i o se atunu’u, o a ni au tapenaga ina ia taunu’u ia te oe le upu, ua filifilia oe e le Atua e ala i le palota a tagata?

UPU FA’AIU – E tele tala o le Tusi Paia, o lo’o iloa ai ta’ita’i lelei na filifili e tagata ma le Atua e tauave tiute fa’ata’ita’i. **O le mea ua mautinoa, e finagalo le Atua ia amiotonu ma ia fa’amaoni lou loto e filifili se ua tatau ma le finagalo o le Atua.** Afai o le na, e lē taumate le fa’amaoni o i latou i o latou tiute fa’ata’ita’i auā e mau le matatau i le Alii o le amiotonu. O tiute foi o tagata lautele, o le filifili i ta’ita’i e fa’asino mai e le agaga o le Atua, ma ia mamao ma ‘alo ese i le fa’atosina a le polokiki, ma ia aua lava nei fa’aitu’au le filifiliga ona o tupe, ma nisi lava auala pi’opi’o ma le eleelea. **MAMATUA O LAU PALOTA, IA FILIFILI FA’ATASI MA LE ATUA.**

MALO LE FA’AMALOLOSII, FA’AFETAI LE ONOSA’I

////////////////////////////////////

ASO SA – MATI 09, 2025 “SU’ESU’EGA I LE TUSI PAIA.”

MATAUPU – “E SAUĀINA LE AMIOTONU AE MANUIA”

TUSI FAITAU – ISAIA – 3: 1 – 15

SINI – Ia fa’asoa atu i tupulaga ina ia tumau ma malamalama, o e sauāina ona o le tutumau i le Alii, e fa’amanuiaina lava i latou.

FESOASOANI MO LE MATAUPU –

O le mataupu o le Tusi faitau mo lenei afiafi, o le ata o le fa’amasinoga ma le malaia e ono o’o ia Ierusalem ma luta, pe afai e lē gaua’i ma lē usiusita’i i le Atua. E ono si’omia Ierusalem e le fili ma fa’atamaia uma ona ta’ita’i. I le fuaiupu 2 – 3, o le lisi umi o tagata e ono a’afia i le puapuaga, o le fa’ailoilo lena o le loloto o le mea e goto i ai le nu’u, a o le fa’ailoga foi lena o le matuiā o le agasala. Aemaise lava, o le paū maualalo o le tulaga i le ta’ita’ina o le nu’u e ona ta’ita’i, talu le malosi o le agasala. O le matutiā ona o le toe fetaua’i lava o tagata o le nu’u lava ia.

O le a pule e tamaiti le malo. O le a sosopo tamaiti i tagata matutua, o le a leai foi se feavata’i ma se fa’aaloalo. Ua soli pala le va tapuia o matua ma fanau, ia po’o tagata matutua ma tamaiti. O le a lē masino le mau fa’afitauli o le a tutupu i totonu o le nu’u ma le tapuaiga i le Atua, ae foliga mai o le a le maua se fofō o ia puapuaga.

Aua a liliu ese le finagalo alofa o le Atua mai ia i latou, o le mautinoa lena o le leai o so latou lavea’iina e maua. Ua fa’ataaloga i vai e le nu’u le agasala, ua lē toe natia se mea e pei ona fai i Sotoma. A o le leaga tele ma le faigata, a’o le fa’anoanoaga sili lea i le finagalo o le Atua, e tau solomua ma amata mea ta’ita’i o le nu’u le fiafia ma le taumafai e opogi tu fa’apaupau ma ua fai ma aganu’u a tagata.

Peita’i, e ui lava i le mamafa o a’ao papa’i ifo o le Atua ua folafolaina, ae o i ai lava le i’u leo o le lavea’iina mo i latou o e amiotonu, auā o le Atua e finagalo i le ola, ma o le i’uga foi o lana fa’amasinoga tonu, e toe i’u lava i lona alofa. **“Fai atu ia i lē ua amiotonu, e manuia o ia, Auā o le fua o latou galuega latou te a’ai ai” (f:10).** O le a o’o mai le aso o le Alii, o le aso lea o le fa’amasinoga tonu, e fa’amasinoina uma ai tagata, o e lelei ma e leaga, aemaise lava i ta’ita’i o le nu’u, sa latou ta’ita’i sesē tagata i ala sesē ole agasala. O alii sili ma toeaiina o le nu’u, o i latou ua ola mai le afu ma le tautigā o nai tagata vaivai ma le matitiva. O uiga le alolofa ia ua alia’e tele ona ua lē malie le mana’o, ma le tu’inanau ua lē ma’ona, ma fa’aaoga ai le tulaga, ae lailoa ai tagata maualalo. Fai mai le Fa’ataoto - **“E lelei si fasi mea ‘ai magumagu, a’o i ai le filemu, ae leaga le fale ua tumu i manu ua fasi, a’o i ai le misa” (Fa’ataoto – 17: 1).**

Manatua, o le mana’otele, e lē gata ina a’afia ai e matitiva, ae leai ai foi se alofa i tagata vaivai. A o i latou nei, o onosa’i lava i mea ua au i ai le malosi ma le mafai, e fa’atalitali ma fa’alagolago i le fesoasoani mai le Atua, i so’o se ala e finagalo ai o la.

FA’AIUGA –

Tupulaga, fa’amata e mafai ona tatou fa’amalolosi ma fiafia e fai le mea sa’o, tusa pe upuia ma faitioina, inosia ai oe ona o le finagalo o le Atua? O le mea ia mautinoa, o ala na mai le Atua. O Iesu foi, sa lailoa lava ona o lana amiotonu, lea na o’o lava ina matagā i le satauro ma le tu’ugamau, a’o le manuia lena o le tagata fa’atuatua ma le amiotonu ua faia e le Atua. Ae fa’apefea i tatou?

GALUEGA FA’ATINO –

1. O le fuaiupu e 4 – 5, O e manatua pe e te silafia foi se tala i le Tusi Paia, ma le taimi na tupu ai se mea fa’apea, e pei ona taua i fuaiupu ia?

Fesoasoani – Taimi ua mavae Solomona, ae tula’i mai lona atalii o Reopoamo e fai ma tupu. Sa ‘au fa’atasi ma tupulaga ae fa’atuatua’i tagata matutua, lea lava sa vevesi ai ma vaeluaina ai le malo.

2. A tupu le mea lea e taua mai le fuaiupu (1), auā e lē atoa se vaiaso e leai ai se mea’ai, ma leai se vai i le lalolagi, o le a sou manatu, e lē matuiā atu ai lava le fa’ama’i oti o le koviti – 19, sa i ai pe leai?

Fesoasoani – E matuiā atu le mea o taua mai le fuaiupu (1), auā e lē atoa se vaiaso ua leai ni mea’ai ma ni vai i le lalolagi, ua leai se isi e totoe ua oti tagata uma.

3. O lea e agasala uma lava tagata o le nu’u, Ae aisea e paū ai le mamafa i ta’ita’i?

Fesoasoani – Ona o ta’ita’i e sau ai le fa’atonuga e usitaia e tagata uma.

Fa’amata o le a mafai e lou talavou ona tumau i le Alii pe a feaga’i oe ma fa’afitauli o le olaga nei, ae maise o lou tula’i malosi e tautala sa’o, ina ia taofia ai le lē amiotonu ma mea sesē e tutupu pea?

MANUIA LE AFIIFI, MALO LE ONOSA’I



ASO SA – MATI 16, 2025 “FA’ATALATALANOAGA FA’ALAUUA’ITELE”

MATAUPU – “O LE TAPUA’IGA FA’ALE – FA’APOTOPOTOGA”

UPU TOMUA –

Ua ou manatu tatou te fa’asoa ma tupulaga i le mataupu o le nei afiifi. O le taumafaiga ua manatu i ai ina ia maua avanoa e fa’asoa ai tupulaga i ni o latou lagona i matupu nei, o lo’o a’afia ai le soifua tapua’i o tagata lolotu o ‘aulotu ma le Ekalesia, aemaise lava o tupulaga.

Ua molimauina le tele o suiga i nei aso e amata mai lava i aiga, o nu’u, Ekalesia ma le atunu’u. O ia suiga ua a’afia tele ai ma le tapuaiga i le Atua. Ae i ai lo’u manatu, o ia suiga ua faia lava i le manatu – **“O LE FUATA MA LONA LOU”** O le fa’amoemoe lea o le fa’asoa i lenei afiifi, e lagaina ai lagona ma manatu o tupulaga, ina ia mafai ona latou tula’i e o fa’atasi ma suiga, a’o a foi ni mea e lē tatau ona suia. O le mataupu o lenei Aso Sa, o se avanoa tatou te fa’asoa ai i nisi o suiga ua va’aia i taimi o tapuaiga fa’a – fa’apotopotoga.

FESOASOANI MO LE MATAUPU –

I le tala fa’asolopito o Isaraelu, o le tapuaiga i le Atua e fa’aaoga ai napeli, o le kitara, o le pu leotele, ma isi me fai fa’a’aili. O le tapuaiga e aofia ai pese ma siva i le Atua.

I tapuaiga a le EFKAS – e lē fa’amalosia le fa’aaogaina o isi mea fai fa’a’aili, e ese mai le piano. Ua masani lava tatou i le tapua’i filemu, ma tapua’i i le agaga ma le fa’amaoni i le Atua, e fa’aaoga ai le piano mo le taina o pese. O nei aso, ua fa’aaoga musika ua tu’itu’i (drums) ina ia maua sina suiga i le fa’alogo ma le usuina o pese, e lē fa’aleaogaina foi lea vaega taua. Peita’i, e i ai foi Ekalesia ma ‘aulotu o lo o tapu ai pea le fa’aaogaina o musika tu’itu’i e taina ai pese lotu.

“O LE A LE TAPUAIGA FA’ALE – FA’APOTOPTOGA.”

O le tapuaiga fa’ale- fa’apotoptoga, o lona uiga, e tatau ona silafia uma e tagata o lo’o fa’apotoptoga e tapua’i i le Atua, le fa’agasologa o le tapua’iga, ma auia fa’atasi uma ai. Ae maise lava la i pese, ina ia pepese ai tagata uma. O le isi nafa tausī a le tagata fa’atuatua i lona va feso’ota’i ma le Atua, **“O LE VIVII”**. O vi’iga e tatau ona saunia lelei ma ia malie i le fa’afofoga a le Atua. Peita’i, o nei aso, ua tatou molimauina le mou malie ese atu o le saunia lelei o vi’iga mo tapuaiga faitele, ona o suiga i fati ma musika o lo’o fa’aaogaina ai.

O le tapuaiga fa’ale-fa’apotoptoga, e tatau ona silafia e tagata uma pese o le a usuina. E tatau ona faitau uma tagata i le Tusi Pai, e pei ona tatou faia pea. O le lauga foi o lo’o faia lava i le tatou gagana, vagana ua afea le tapuaiga i ni malo mai fafo, ona taumafai lava lea o sina vaega e fa’ailoa ai le feau o le aso. Ou te taofi, o lo’o lelei pea le fa’agasologa o lo’o i ai a tatou tapuaiga i aulotu. Ae fia fa’ataua lava le itu i pese ma suiga ua tatou iai ona o fati ma faiga. O le fa’amoemoe mauuluga o nei faiga, ia laugatasia tagata uma i le tapuaiga ua faia i ona vaega uma. Ia aua nei afaina le loto tapua’i ona o le lē pese auā e lē iloa le fati ma le pese. E malie lava a tatou pese tuai ma fati tuai, ae fa’aopoopo iai sina musika la’iititii e iloga ai se suiga ia malie i le usu ma pepese ai tagata tagata uma o lo’o potopoto e tapua’i i le Atua.

SUIGA O PESE I TAIMI O TAPUAIGA –

E lua ituaiga o lo’o mafai ona tatou fa’alogo ai i aso uma

1. Secular music – musika fa’ale-lalolagi 2. Sacred music – musika paia

O nei aso, ua i ai fati ma musika faale lalolagi ua faaoga e taina ai pese lotu.

Fesili – O le a se manatu i le Autalavou, o se faiga lelei lea faiga pe leai? (Fa’asoa i ai ma Tupulaga i ni o latou manatu).

2. E lē fa’asāina e le tatou mataupu le fa’aaogaina o ia fati ma ia musika, a’o le tu’ualalo, afai e a’afia ai le soifua tapua’i o nisi ona o le so’ona fa’aaoga e fia viia ai, e matuā fautuaina le taofi. E tatau foi ona filifili lelei fati, aua o isi fati fa’ale- lalolagi e mafuli lava i fatuga o se pese i faigauo o lenei lalolagi a tupulaga. O ia ituaiga musika ma fati, ou te manatu lava e le tatau ona fatiina ai ni pese lotu. Ou te matuā lagolagoina a tatou pese ma a tatou fati ua i ai. Afai foi e manatu e fa’aopoopo sini musika, ua lelei foi lea, auā o le a maua ai se suiga e malie ai i le usu a tagata o lo’o tapua’i fa’atasi.

SIVA MA PESE I TAIMI O TAPUAIGA –

O tatou faiga masani, e lē fa’amalosia le siva ma pese (e pei ona fai e isi tapuaiga), se’i vagana aso fa’amanatu, Aso Sa Tinā, Aso Sa Tamā ma le Lotu Tamaiti. E ai foi taimi ua fa’aaogaina ai siva fa’ale- Agaga i lotu a le Au leoleo ma le Au taumafai, Mafutaga tinā. O ia suiga ina ia eseese va’aiga e fa’amatagofie ai le polokalame i lea aso, ma fa’agae’etia ai lagona tapua’i o tagata i le Atua, ae lē o se mea e tumau i tapuaiga. E leai foi se manatu e finau i ia faiga, o se mea lelei foi lea.

GALUEGA FA’ATINO –

E i ai mataupu e feso’otai i pese ma vi’iga o le Lotu ua lisiina atu i lalo e mo’omia i ai se fa’asoa a le Autalavou. Ia tu’uina i le Autalavou le fesili, po’o ai e lagolagoina le mataupu, a’o ai foi e tete’e. E lē o se finauga, a ia manino mafua’aga o le ioe po’o le tete’e.

FESILI -

E o atu tagata i le lotu ma nonofo i tua, ua lē pepese fa'atasi ai ma le 'aufaipese.

1. O le a se taofi o tupulaga, e mafai ona aveese le 'aufaipese fa'apitua a le 'aulotu, ae fa'amalosi tagata uma e tapua'i i sauniga e fai ai le 'aufaipese.
2. Ia fa'ata'atia lelei se polokalame e fa'aofi mai ai agaga o tagata i le tapuaiga i pesepesega.
3. Fa'amata e lē lelei ona tatou tutū uma i luga ma pepese fa'atasi e sa'o ai le leo e sau i fafo, nai lo le nonofo ma pepese? (e leai se manatu e fa'ata'ita'i i le Metotisi, ae fia maua se manatu o Tupulaga)
4. E tatau ona lava tagata o le 'au Asafo ma fa'amalolosi e fa'aaoga le tomai ma taleni i pese mo le viiga o le Atua.

TOE MANATU –

I totonu o le Tusi Paia, e lē o fa'asāina ituaiga musikla o fa'aaogaina, ae ia silasila toto'a ina ne'i tausuai nisi ona o fati ma le tu'itu'i o le musika ua so'ona fa'aaoga, ina ne'i manatu i tagata, ae fao ai le vi'iga o le Atua. O le aoao tetele lava o leni taumafaiga, ia fa'soa le Autalavou ma manatunatu i le taua o le fa'apotopoto e tapua'i i le tapuaiga e tasi. Ia pepese uma tagata o le Ekalesia, e pei ona fai i isi vaega o a tatou tapuaiga. Ae sili ai ia pese mai le Agaga ma le loto fa'amaoni i le Atua. Ia auai tagata uma ua potopoto e tapuai i le Atua i pese ma viiga ia lona mamalu ma lona Silisili – ese.

MANUIA LE FA'ASOA, MALO LE FA'AMALOLOS



ASO SA – MATI 23, 2025 “SU'ESU'EGA I LE TUSI PAIA”

MATUPU – “O LE AGAGA PAIA O LE ATUA”

TUSI FAITAU – GALUEGA – 1: 1 – 5

FESOASOANI MO LE MATAUPU –

O taofiaga lava na a'oa'oina ai i tatou, o le Agaga Paia o le Peresona lona tolu lea o le Atua, Le Atua le Tamā , Le Atua le Alo , ma Le Atua le Agaga Paia. O le Agaga Paia i le gagana Eperu i le Feagaiga Tuai – o le ruach, ae o le fa'a – Eleni – Feagaiga Fou, o le pneuma. E uiga tutusa upu ia e lua, - o le manava (to breath) – o le ola. O lona uiga o le Agaga Paia o le Atua, “**o le ola.**” E i ai fa'ailoga po o va'aiga e iloa ai le Agaga Paia o le Atua – (characteristics & personality), i le soifuaga o le tagata.

1. O le agaga o le Atua na te aumaia le fiafia ma le filemu i le loto o le tagata. (comforter)
O le Agaga Paia na te aumaia le fiafia ma le filemu i loto ua mafatia. O le mafanafana e fa'amafanafana i le 'au fa'atuatua pe a fetaia'i ma faigata.
2. O le Agaga Paia o le Atua e fa'apotoina ai le tagata fa'atuatua. (intelligence)
O le Agaga Paia na te musumusuina loto ma agaga o tagata fa'atuatua i le mea e tatau ona fai ma le mea e lē tatau ona faia. (I Korinito – 12: 1, 8 – 11,) o lo'o fa'amauiina ai

meaalofa, o taleni ma agava'a mai le Agaga Paia e fa'atamāoaigaina ai le tagata fa'atuatua. O taleni ma agava'a, e pei o le Foma'i, Faifeau, Tusiata, Faiaoga ma le tele o isi meaalofa ua fa'apotoina ai i tatou e le Agaga Paia. O le Agaga Paia, o le Ola na te aumaia taleni eseese e fa'atamāoaiga ai le ola o le tagata fa'atuatua. O le Agaga Paia o le Fesoasoani sili mo le 'au fa'atuatua. (Ioane – 14:26, 15:26, Roma – 8: 16, Galuega – 2: 1 – 4, I Korinito – 12: 11)

AUA NEI FA'ATAUSUAI SE ISI I LE AGAGA PAIA –

la fa'asoa i tusi faitau ia –

1. MATAIO – 12: 31 – 32 – Ua fetalai Iesu, ia aua nei ulagia e se isi le Agaga Paia.
2. GALUEGA – 5: 9 – O le oti o Anania ma Safaira, na mafua ina ua la pelogia le Agaga o le Alii e ala i le ta'utinoga na fai ae mulimuli ane ua lē faia.

GALUEGA FA'ATINO –

la tu'u le avanoa i nisi o le Tupulaga e molimau ai i se mea na tupu i lona olaga e fai ma pine fa'amau o se galuega a le Agaga Paia. Fa'ata'ita'iga – fa'asaoina mai se fa'alavelave, ma isi lava mea tutupu.

FA'AI'UGA – O le Agaga Paia na te aumaia le fiafia ma le mafanafana, atoa ma le filemu i taimi o faigata. E iloa le agaga Paia i taleni ma agava'a ua tatou maua. Aua le ula i le Agaga Paia.

FESILI FA'ATUPU MANATU –

1. Afai o le Agaga Paia o le Atua na te aumaia le ola i le tagata, aisea la ua to'atele ai pea tupulaga ma tagata ua lē mafai ona tete'e le 'aisa ma fuala'au o'ona, aemaise o amioga matagā ua sasao pei se afi i lo tatou atunu'u?
2. O lo'o fotu fa'afuata foi le fia pule pea i le ola o tupulaga, ua alualu foi i luma le tele o tamaiti ma fanau leiloloa, Aisea?
3. O le a sou leo fa'atalavou i faiga lē amiotonu ua va'aia i totonu o le atunu'u, fa'amata e mafai ona o'o le leo o tupulaga i ia mea, ae e te manatu o le a se mafuaaga?
4. Fa'amata e mafai ona fa'aaoga au taleni e o'o atu ai le fiafia, le mafanafana, aemaise o le filemu o le Atua i tagata ua i ai i faigata o le olaga, ae maise lava o tupulaga, auā e iloa le Agaga Paia o le Atua i le tagata i taleni ma agava'a ua tatou maua.
5. Fa'amanatu tupulaga, aua le te'ena le Agaga Paia o le Atua, ae matuā tete'e satani ma ana fa'aosoosoga, auā e lē o mea uma e i'ila o auro ia.
6. Fa'amaea i se saunoaga a lau Susuga a le Fa'afeagaiga.

MANUIA TELE LE FETUFA'AIGA I LE MAFUTAINA E LE AGAGA PAIA.

////////////////////////////////////

ASO SA – MATI 30, 2025 “SU’ESU’EGA I LE TUSI PAIA”
MATAUPU – “O LE FAITOTO’A UA VALIVALIINA”
TUSI FAITAU – ESOTO – 12: 22

“Tou te ave foi se fusi isopo ma fufui i le toto ua i le ipu, ma ta a’i le la’au fa’alava i luga ma pou e lua o le faitoto’a i le toto i le ipu, aua foi nei i ai so outou e ulufafo atu i le faitoto’a o lona fale seia o’o i le taeao”

FESOASOANI MO LE MATAUPU - O le isopo e sasala lona manogi, Ua fa’aaoga e vali a’i faitoto’a e fa’aitiitia ai le manogi o le toto. E iai le talitonuga o fusi isopo foi na ala usu ma tinā i le tu’ugamau e asi ai Iesu. “fusi isopo – isopo – fugāla’au manogi – fusi isopo, “o fugāla’au manogi ua fusifusi fa’atasi (bundle of hyssop), ae fa’aaoga e vali a’i faitoto’a.

O le fa’atonuga lea a le Atua ia Mose e fa’ailoa atu ia Isaraelu ina ia latou ave i toto o tama’i mamoe, ma valiina ai luga o pou e lua o le faitotoa ma ona la’au fa’alava i luga o latou fale. O se fa’ailoga e iloa ai e le agelu aiga o Isaraelu, pe a o’o mai le to’asā i le nu’u o Aikupito. A vali le faitotoa, e sopoloa le agelu, pe fa’apea ua ola lona aiga. Auā a lē valiina, o le a o’o i ai le oti i le ulumatua o lona aiga.

O le faitoto’a ua valiina o lo’o atagia mai ai ni feau o lo’o i tua atu o lona fa’aaogaina –

1. **O LE OLA** – Ua fa’asaoina le ola mai le to’asā o le Atua ona ua usita’i e fa’atino le finagalo o le Atua. Aisea? Ona e fia ola pea. O le ola e maua pe a savavali i poloaiga a le Atua, lea e afua ai le mataitusi lona lima o le alphabet Eperu o le **(he)**. – **o lona uiga o le ola**. Lea foi e atagia mai i le tusiga o le mataitusi le ata o le faitoto’a ma ona pou fa’atutū e lua ma le la’au fa’alava i le pito i luga.
2. **O LE TAULAGA** – O le valiina o pou o faitotoa o le fa’ailoga o le ola faitaulaga o tagata e ui ina aumau i nu’u ese. Auā afai o mamoe lava e osi a’i taulaga, lea foi ua avea le toto e valiina ai faitoto’a, o se auala e fa’ailoa atu ai le taulaga o le taliaina o le finagalo o le Atua.
3. **O LE TOFOTOFOGA** – O le faitoto’a ua valiina, ua fai ma auala a le Atua e toe tofotofoina ai lona nu’u po o tumau pea lo latou fa’atuatua ia te ia. O le isi foi auala lea na taumafai ai le Alii e fa’ailoa ia Farao ma Isaraelu lona Silisili-’ese, ina ia fa’amausalī atili ai la latou Feagaiga osi ma lona nu’u.
4. **O LE FA’AOLATAGA** – O le faitoto’a ua valiina, o le fa’ailoga o le fa’aolataga mo Isaraelu ina ua ma’ea le mala mulimuli ma malie ai Farao e fa’asa’oloto mai i latou.
5. **O LE TOTO O LE TAMA’I MAMOE** – O se feau taua o le vaega lenei, o le fa’aaogaina o le toto o le tama’i mamoe, o le fa’ailoga o le ola. Auā ana lē valiina le faitoto’a i le toto e lē mafai ona fa’asaoina Isaraelu mai le mala.

FAITOTO'A UA VALIINA MA LE FAITOTO'A VAAPIAPI –

Ua manino atu i le folasaga i luga le uiga o le faitoto'a ua valiina. O le fa'ailoga o le ola. Auā a le valiina le faitoto'a, e lē fa'asoina mai i le to'asā o le Atua. Ae fa'apefea ona feso'ota'i ma le faitoto'a vaapiapi lea e fetalai ai Iesu – “Ia outou finafinau ina ia ulu atu i le faitoto'a vaapiapi; auā ou te fai atu ia te outou, e to'atele latou te taumafai e ulu atu ai, ae le mafai lava” (Luka – 13: 24).

O tala fa'a – fa'ata'oto nei a Iesu o lo'o fa'atatau i le taliaina e tagata o le malo o le Atua, auā o le taliaina lava lea o Ia. Lea lava e fa'apupula mai e Iesu e lē mafai ona sao atu i le malo o le Atua, pe a le ui mai i le faitoto'a vaapiapi. **O le a lea faitotoa vaapiapi? – O IESU.**

O Iesu ua fa'atusaina i le faitoto'a e va iti ma e faigata ona ulufale ai se tasi. O lana galuega fa'aola na afio mai ai i le lalolagi na fa'afitia, 'amusia ma te'ena e le to'atele o tagata. Sa faigata ona taliaina le finagalo o le Atua na tau ala mai ia Iesu a'o ala ia e tatau ona savalia e le tagata ina ia sao ai i le malo o le Atua. E faigata la ona sao atu se tasi i le malo lea, pe a lē ui muamua i le faitoto'a vaapiapi, **o Iesu lea**. O le olaina o ala na a'oa'o mai ai Iesu ia i tatou, o le a lē fesiligia ai lo tatou sao atu i lona malo e fa'avavau.

O le faitoto'a vaapiapi e fa'atauva'a i le va'ai ma lona uiga, ae o le faitoto'a e faigata fo'i ona ui ai se tasi. A o i latou ua taliaina ma faia le finagalo o le Atua e pei ona a'oa'o mai e Iesu,, o le a faigofie ona ulu atu i lea faitoto'a vaapiapi ma sao atu ai i le malo o le Atua, o lo'o tausinio uma i ai tatou.

O le faitoto'a vaapiapi o le ala lea i le ola e fa'avavau.

O le faitoto'a ua valiina ma le faitoto'a vaapiapi, o faitoto'a e lē faigofie ona asaina e se tasi. O faitoto'a e mana'omia le galueaina o le lotro o le tagata ina ia faigofie ona taliaina le finagalo o le Atua. E mafai foi ona avea le loto ma faitoto'a ua valiina po o le faitotoa vaapiapi.

O le loto ua tete'e, ma le loto ua naunau e faia le finagalo o le Atua, e fua i ai lo tatou maua o le ola e fa'avavau. Auā a le tatalina le faitotoa o lou loto e te taliaina ai ala e uia ai nei faitoto'a, e lē mafai ona tatou maua le Ola. ***O le faitoto'a ua valiina o le fa'ailoga o le ola mo Isaraelu ina ua fa'aolaina mai pulega sauā a Aikupito, a o le faitoto'a vaapiapi, o le fa'ailoga o le ola mo tagata uma o le lalolagi. E lē fa'apito na o Isaraelu ae mo tagata uma, e aofia ai ma tagata o nu'u ese.***

GALUEGA FA'ATINO –

1. Ia fa'asoa i le Autalavou faitoto'a i taimi o 'olo (Tower) – na o le pau lea o le auala i fafo ma totonu i le nu'u. E leai lava se isi auala, e na o le tasi lava.
2. Fa'asoa ma fa'atalanoa le Autalavou i so latou malamalama i le taua o le faitotoa ua valiina e tusa o le tala fa'amauiina i le Esoto – 12: 22, ma le faitotoa vaapiapi.

UPU FA'AI'U – O le taliaina o le finagalo o le Atua e pei ona fa'ailoaina i le faitoto'a ua valiina, o le fa'aolataga sili lena, e fa'apena foi i le faitoto'a vaapiapi lea e fa'asino ia Iesu. A lea na fetalai manino – O A'u nei o le Faitoto'a, afai e ui mai se tasi ia te A'u, e fa'aolaina ia, e alu atu ma ulufafo, e maua foi e ia le mea e ai” (Ioane – 10: 9). O lona uiga o Iesu Keriso, o ia lava o le ala i le malo o le Atua, o ia o le faitoto'a ua tatala mai mo i tatou pe afai ua tatou talia o ia i le loto ma le fa'atuatua. Auā o lē ui atu i lena faitoto'a e fa'apaleina i manuia o Keriso, auā o ia o le ki

ma le tatala i lona faitoto'a. Fai mai e maua e lona tagata le mea e 'ai, o le a lea mea'ai? – O le ola fa'aleagaga, pe afai ua talia le Faitoto'a. O le toto o le tama'i mamoe na valiina ai faitoto'a o Isaraelu, o le fa'ailoga o le fa'aolataga mo le nu'u o le Atua. E fa'apena foi ia lesu ina ua maligi lona toto i luga o le satauro ina ia fa'aola le lalolagi uma ma togiola mo a tatou agasala, pe afai tatou te salamō fa'amaoni. Lea lava ua tatou fa'amanatu i aso fa'amanatuga – O le ipu lenei o le Feagaiga Fou lea i lo'u toto, ia outou faia lenei mea ma fa'amanatuga ia te a'u, i aso uma tou te feinu ai.”

Fetalai le Alii Fa'aola – O A'u nei le Ala ma le Upu moni ma le Ola, e lē alu atu lava se tasi i le Tamā, pe a lē ui mai ia te a'u. (Ioane – 14: 6). O lona maliu ma lona toetu manumalo mai le oti ma le tu'ugamau, lea ua fa'apaleina ai i tatou i le ala i le faitoto'a vaapiapi e fa'avavau, pe afai ua tatou salamō fa'amaoni ma fa'atuatua ia te ia.

MANUIA TELE LE FETUFA'AIGA, FA'AFETAI LE ONOSA'I

////////////////////////////////////

ASO SA – APERILA 06, 2025 “FA'ATALATALANOAGA”

MATAUPU – “E LEAI SE TASI E TU FA'AMAUGA I LE OLAGA NEI”

FESOASOANI MO LE MATAUPU –

O upu ua fai ma manatu autu o le fa'asoa i lenei afiafi, e masani ona fa'amatala a'i se tagata e fa'amauualuga i ona lava manatu. E va'ai mauualo i isi tagata. O ana fa'atinoga ma lafoga e lē maua ai se filemu. Auā ua manatu lava o ia ua sili i tagata uma. Peita'i, e i ai lava le aso e vaivai ai ma mo'omia le fesoasoani. O le uiga lea o upu - **E LEAI SE TASI E TU FA'AMAUGA ILE OLAGA NEI.**

O nisi o tala mai le Tusi Paia ua filifilia mo le tatou mataupu –

1. **TALA IA FARAO** – O Farao o le tupu o Aikupito, sa ta'uta'ua i le loto fa'amauualuga ma le fa'asausili. O Farao lenei, o lo'o i ai le tele o tusitusiga, o le isi lea atua o Aikupito. O le ala lea o le fa'afaigata ona fa'amatuu e Farao o Isaraelu, ona o lona manatu, o ia foi o le isi atua e tutusa ma le Atua soifua. Peita'i, na tupu loa le mala lona sefulu, na fasiotia uma ai ulumatua uma o Aikupito, aofia ai ma lona atalii matua, o inā na a'oa'oina ai Farao i le malosi o le Atua o Isaraelu. Ua iloa ai e Farao e leai lava se isi e tu fa'amauga, e i'u lava i le vaivai.
2. **TALA IA KOLIATA** - O le toa o Filisitia. O le tagata mauualuga ma le malosi, O le ala lea o le faifai i le Atua o Isaraelu, i lona manatu, ua leai lava se isi ua tutusa ma ia. Peita'i, na saunia e le Atua Tavita, tino itiiti ma fa'atauva'a, e fa'atoilalo lona malosi. (I Samuelu – 17).
3. **TALA I LE PULE O LE TAUSAMAAGA** - O le pule o le tausama'aga e gafa ma le tele o tiute ina ia sologa lelei le fa'amoemoe e potopoto ai tagata. E pei foi o tatou i Samoa nei, i taimi o fa'aipoipoga, o aso fanau, ma isi fa'atasiga.

O le tala i le vavega na tupu i Kana i Kalilaia ina ua uma le uaina o le fa'aipoipoga. Na fesiligia ai tiute o le pule o le tausama'aga ona o le uaina ua uma. O le upu pule o lona uiga o le steward i le fa'aperetania. O lona uiga, o le tagata lea ua tu'u i ai le fa'amoemoe ina ia va'ai lelei o mea totino uma, ma isi mea i totonu o se fa'ala potopotoga. O ai lava e filifilia e tataua ona lava le tomai ma le agava'a ia po'o le experience i galuega fa'apea. Peita'i, o lea ua valetu'ulima ona tiute, ona o le fa'atamala, ua semanu lesu na maua ai le uaina lelei mo tagata uma. Na o lesu e atoatoa ai o tatou tiute ma o tatou faiva.

4. **NA'AMANU MA VAITAFE O LONA NUU** – O le tala'aga ia Na'amanu, o le alii e pule i 'au a le tupu o Suria po'o Arama foi i le itu matu o Isaraelu (north of Israel). O le toa malosi ta'uta'ua, ae na maua i le ma'i lepela. Ina ua o'o i le fale o Elisaia le perofeta e fa'amalolō ai o ia, na fa'atonu ai o ia e tofu fa'afitu i le vaitafe o Ioritana. O le fesili a Na'amanu le Suria, o lo'o atagia ai lona fa'amaualuga i vaitafe i Suria, ma manatu fa'atauva'a i vaitafe o Ioritana. Fai mai a ia "...e lē sili ea ona lelei Apana ma Farafa o vaitafe ia o Tamaseko i vai uma o Isaraelu? Ou te lē ta'ele ai ea ma ou mamā ai?" Ua manatu fa'atauva'a le tupu i vaitafe o Ioritana e manuia ai, Peita'i, na ala mai le Ioritana a'ao fa'amalolō o le Atua ma manuia ai o ia. (2 Tupu – 5)

5. **O LE TALA IA APIMELEKO** - O le atalii ia o Kitiona mai se tasi o ana auauna fafine. E 70 atalii a Kitiona na fanaua lava e ia, e ese ai ma Apimeleko., Ua alu Apimeleko i Sekema i le aiga uma lava o le tamā o lona tinā, ma fa'atauanau i latou ia fai ia ma tupu, ae fasioti le to'afitugafulu o atalii mo'i o Kitiona. A faitau i ai i le tala atoa i le mataupu e 9, e le'i i'u lelei le nofoaiga a Apimeleko, ona o lona fa'asausili, ina ua fa'atauanau lava e ia tagata e fai o ia ma tupu. Ae o le tala a Kitiona na fai ia Isaraelu a'o soifua,ou te lē pule ia te outou, e lē pule foi lo'u atalii ia te outou, e pule le Alii ia te outou" (Fa'amasino – 8:23. O le mea na fai e Apimeleko, ua ia fao le nofoaiga a le Atua ia Isaraelu. Ua aumaia le pale paia o le Atua, e fa'apale ai o ia, Na o'o lava ina pale o ia, i le pale o le oti. (Fa'amasino – 9)

GALUEGA FA'ATINO –

1. O a ni fa'ata'ita'iga ua maitauina e tupulaga i totonu o le si'osi'omaga o lo'o soifua ai o lo'o atagia ai le tu fa'amauga o nisi tagata?
2. E fa'apefea ona fesoasoani lou talavou i tagata po'o tupulaga e maua i le loto fa'amaualuga ma le fa'asausili?

FA'AI'UGA – O nisi ia o tala ua filifilia mo le tatou mataupu, o lo'o fa'amatala ai ta'ita'i ma tupu, ua fa'asili lo latou malosi ma mea ua maua ae galo ai le Atua. O le mataupu e fa'atupu manatu, ma ua a'oa'oina i tatou tupulaga, e leai a se isi e tu fa'amauga i le olaga, tatou te mo'omia lava le fesoasoani i se taimi. E lē tumau se tagata i sona malosi ma sona iloa, e i'u lava i le vaivai ma mo'omia le fesoasoani. Manatua o le natura lava o le tagata le sesē. Ae aua le manatu fa'apito

ma fa'amauualuga i au galuega e fai. Ia e iloa ona mata'u i le Atua, o le amataga lea o le potu la fa'ataua leo o tagata i totonu o le sosaiete, ia soālaupule fa'atasi.

MANUIA LE FETUFA'AIGA I LENEI AFIIFI



ASO SA - APERILA 13, 2025 "ASO SA O LE LAUPAMA"

MATAUPU – AISEA NA TI'ETI'E AI IESU I LE ASINI, AE LE TI'ETI'E I SE SOLOFANUA"

UPU AMATA – O le Aso Sa lenei o Laupama o lo'o fa'amanatu ai le malaga fa'atupu a Iesu i Ierusalem. O le malaga o lo'o ti'eti'e ai Iesu i le tama'i asini, Peita'i, o lea ua fesiligia e le tatou mataupu, pe aisea na lē ti'eti'e ai Iesu i se solofanua?

FESOASOANI MO LE MATAUPU – Ia toe fa'amanatu le taua o le Aso Sa o le Laupama. O le fa'ailoga o le loto mauilalo i le malaga fa'atupu a Iesu i Ierusalem. O laupama, o le fa'ailoga o le fa'amalumuluga. Aemaise taimi e laina ai le tagata i le mu tinitini o le la, e mana'omia se paolo e mapu ai le tagata. O le laupama o le fa'atusa lea o le fa'apaolo o a'ao o le Atua, e auala mai i le malaga fa'atupu a Iesu Keriso i Ierusalem.

O LE SOLOFANUA MA LONA AOGA –

Na iloga le aoga o solofanua i le 'afa muamua o le meleniuma lona 2, ina ua fa'aaogaina e tagata tau o Aikupito sa taua o Hyksos seia o'o mai i nei aso. O le solofanua i le va'ai a tagata tau – **o le fa'ailoga o le malosi ma le saosaoa**. O solofanua latou te toso kariota i taimi o taua. E amuia se 'au tau e tele ni a latou solofanua, e lē gata e saogalemu tagata tau, ae to'atele foi le fasi i ona fili. O le malosi o le solofanua e pei ona fetalai le Atua ia Iopu – o le malosi e o'o ai i taua e lē fefe. (Iopu – 39: 19 – 25). I le fa'avasegaina o manu e fa'aaogaina i malo tetele, o le solofanua o se manu e taua ma aloaia (valued as honourable and mobile animal). E lē gata e fa'aaogaina i taimi o taua, ae fa'apena foi i taimi o malaga fa'atupu. O le ti'eti'e atu o le tupu i le solofanu, o le fa'ailoga o le tupu malosi e to'atele lana 'autau ma lelei lona tamāoaiga.

LAPATAIGA IA AUA NEI FA'AMOEMOE I SOLOFANUA.

1. **Teuteronome – 17: 14 – 16** – Na fai atu Mose i le fanauga a Isaraelu, afai e filifilia se tupu, aua nei fa'ateleina ni solofanua, aua foi nei fa'atau ni solofanua mai Aikupito. A va'ai fa'ale-mataupu silisili i lea tulaga, aua nei fa'aaogaina solofanua e fai ai ni 'autau ma si'i taua ai i nisi nu'u. Aua le fa'amuumua le malosi fa'ale- tagata. Ae fa'amoemoe i le pule mai le Atua. O lona uiga, o le solofanua e fa'atusa i le malosi e fa'aaogaina i se taua. (warhorse)
2. **I Samuelu – 8: 11 – 17** – O le fautuaga a Samuelu i le nu'u ina ia iloa ituaiga pulega o le a faia e so latou tupu e tulai mai. O tupu o le a fai a latou fanau ma tagata e ti'eti'e i solofanua, e fai ma kariota. O lona uiga o pulega ia e fa'amoemoe i le malosi o le tagata ae lē o le Atua.

3. **IOSUA – 11: 9** - O le fa'atinoga ua fai, ina ia mautinoa le fa'aumatia o solofanua ma kariota na fai ma 'aupega a le fili "Ua vaea vae o solofanua ma susunu i le afi." E silia ma le afe le faitau aofai o fili o Isaraelu na fa'aaogaina solofanua ma kariota. A o le 'autau a Isaraelu e toeitiiti. O le fa'ailoga o le Atua e tau mo Isaraelu. O le ala manuia lea o taua e feagai ma le nu'u o le Atua, auā e lē o i latou, a o le Atua o lo'o tau mo i latou. E lē o le fa'amoemoe i le malosi o tagata tau ma le tele o solofanua, po'o le tamāoaiga fa'ale-lalolagi, a'o le Atua soifua.

O LE ASINI MA LONA AOGA - O asini na taunu'u i Palesitina i le meleniuma lona 4, tausaga Lumana'i le Mesia (TLM) mai Aikupito. O le asini ua ta'ua o le manu e filemu, ma o le manu o le avega. (humble and a beast of burden). Auā e gafatia e ia se amoga mamafa i luga o le auala. O asini e faigata ona fa'ate'i, e lē pei o le solofanua. O le asini e na te iloa fa'afitauli o lo'o tutupu i luga o le ala, pe savali pea pe 'alo i se isi auala. (Donkeys are very cautious of theirsurrroundings than horses). Se tasi lea o manu e vai maualo i ai tagata. E le tino malosi ma saosaoa e pei o le solofanua. Ae telē le aoga o le asini i totonu o Palesitina, aemaise i taimi o fefa'ataua'iga o oloa i taua i o latou nu'u tuā'o'i, ma feau e fai a aiga.

O TALA I LE AOGA O LE ASINI –

1. **FA'AMASINO – 15: 15 – 17** – Na fa'aaogaina e Samasoni le ivi 'auvae o le asini e fasi ai tagata e afe. O le fa'ailoga e iloa ai le malolosi o ponaivi o le asini i lo ponaivi o le solofanua. E pei lava ona taua i luga, o le asini e fa'aigoaina o le manu ave avega – beast of burden. Po o le a lava le mamafa ma le telē o se avega, e tauamo lava e le asini, aemaise lava o luga o mauga ma le gaoa. O le asini e lava le onosa'i, e lē fa'alialia vale i sona malosi, e lē amanaia e tagata taualoa ma tupu, ae na o aiga ta'itasi latou te fa'aaoga le asini mo a latou feau masani. **E aoga le asini i tagata vaivai, a'o le solofanua e fa'aaoga tele e tagata mau'oa, ona o le ulavale ma fa'alialiavale.**

O foliga ia o le malaga fa'atupu a Iesu. O le malaga e fa'ai'u i le satauro mo le fa'amagaloina o agasala a le lalolagi. E va'ai le tagata i le maualuga ma le saosaoa o le solofanua, ae lē amanaia le asini. E lē amanaia e tagata malolosi ma tagata mau'oa, a'o le tagata vaivai ma mama'i, o Iesu le tali o fa'afitauli. O le malaga fa'atupu a Iesu i Ierusalem, na sau i le auala maualo.

2. **NUMERA – 22:21 – 39** – O le tala ia Pala'amo ma lana asini, o lo'o atagia ai le atamai o le asini i le iloa o mea o lo'o tutupu i lona si'osi'omaga. E le'i te'i le asini ina ua iloa atu le agelu a le Atua. Ae na 'alo ese ma fa'apaū i lalo. E le'i iloa e Palaamo le agelu, a o le asini na ia iloa. Semanū le asini na fa'asaoina lona ola mai le pelu a le agelu. O le asini na fa'asaoina le ola o Pala'amo. O foliga va'aia ia o le malaga fa'atupu a Iesu, o le malaga ina ia fa'aola tagata e ala i ona puapuaga o lo'o fa'atali mai i Ierusalem.
3. **SAKARIA – 9:9 – 10** – O le valoaga o le Mesia o lo'o ti'eti'e i luga o le asini, o lo'o taua mai i le fuaiupu e 9. Ae o le fuaiupu e 10, o lo'o taua ai le fa'aumatia e le Atua o kariota ma solofanua. O lea foi ua toe fa'amaonia, o le malaga fa'atupu a Iesu i Ierusalem, na sau e aumai le filemu ae lē o se taua.

O le malaga fa'atupu a le Alii e lē tutusa ma le malaga a se tupu o lenei lalolagi. Pe a fa'atusatusa i nei aso, e matuā faia lava tapenaga i siva ma pese. E teuteu ma fa'amatagofie mea uma e o' lava i tafā ala. O nisi atunu'u e ta'o'oto tagata ae savali ai le tupu po'o se tagata maualuga o se malo. A'o Iesu, na fola i lau o pama le ala ma ofu o tagata. A o ia tagata, o tagata vaivai ma le fia ola i pulega a e maualuluga. O tagata matitiva ma le mama'i. Auā e le'i fofolaina ni ofu talaloa po'o ni ofu tupu, ae savali ai le asini.

FESILI FA'ATUPU MANATU –

1. O le a se feau taua mo oe le tama ma le teine talavou mai lenei mataupu i ia manu e lua?
2. O le a sou sao fa'atalavou i le fa'amautuina o le feau o le laupama ma le malaga fa'atupu a Iesu i Ierusalem ma le vaiaso paia ua amataina nei?
3. O oe o se talavou fia malosi ma fa'alialia vale, po'o se talavou filemu e ola ai isi tupulaga ua maua e le tiapolo?
4. E mafai ona e ta'utino o oe o se talavou e fa'aogaina e le Alii e o'o atu ai lona finagalo alofa i le lalolagi, ina ua e auai fa'atasi ma ia i ona puapuaga?
5. Fa'aiu i se saunoaga a lau Susuga a le Fa'afeagaiga ma fa'ai'u ai le mataupu.

MANUIA LE ASO SA O LAUPAMA



ASO SA – APERILA 20, 2023 “ASO SA O LE TOETU”

MATAUPU – “O LE ALOFA TUNOA O LE ATUA”

TUSI FAITAU – ROMA – 5: 1 – 11

UPU AMATA – O le Aso Sa lenei o lo'o fa'amanatu ai e le 'au Kerisiano uma le toe soifua manumalo o Iesu Keriso mai le oti ma le tu'ugamau. O le atoaga o le Fa'aolataga na fai i le ALOFA TUNOA mo le lalolagi agasala ma tatou uma.

FESOASOANI MO LE MATAUPU –

1. **O LE A LE ALOFA TUNOA?** - O le alofa tunoa o le Atua i le fa'aperetania, o le **Grace of God**. I le gagana Eleni, o le alofa tunoa. (**karis**). A fa'amatalaina, o le alofa e lē fa'atuaia. O le alofa e lē manaomia se tau. O le alofa e lē fa'avaea i se isi lava mea, a'o lona lava finagalo faito'atasi ua afua ai. O le mataupu la o lenei Aso Sa, ua fa'aaogaina ai le tusi a Paulo i le Ekalesia i Roma.

O LE TUSI A PAULO IA ROMA – E i ai le talitonuga e le'i fa'atuina e Paulo le Ekalesia i Roma. A'o le Ekalesia na mafai ona fa'avaeina e lutaia Kerisiano o lo'o nonofo i Roma. O i latou na liua e avea ma kerisiano i le Aso Penetekoso, ina ua 'auina ifo le Agaga Paia o le Atua ma to'ia ai i latou, o e na fa'atalitali ma le loto gatasi i Ierusalem – Galuega 2.

TAIMI MA LE NOFOAGA NA TUSI AI LE TUSI –

O le tusi, na tusia e le Aposetolo o Paulo, i le tausaga T. A - 56 – 57, i le vaitau o le tau malūlū (winter) aga’i i le amataga o le tau totogo (spring), a’o i ai Paulo i Korinito, ina ua malōlō ane mai lana galuega tala’i i Efeso. (T.A 52 – 55) – GALUEGA 19.

O LE TUSI FAITAU – ROMA 5: 1 – 11.

Ua fa’apupula atili ai e Paulo le uiga o le feau tupito o lo o lualuga i le tusi lenei ia Roma. ***O le ta’uamiotonuina i le Fa’aolataga na saunia e le Atua i lona alofa tunoa.*** O le Fa’aolataga ua ta’uamiotonuina ai le tagata fa’alē- mata’u, ona o Iesu ua fai ma sui e ala i lona maliu.

O le fa’aolataga ua mitamita ai le tagata ina ua ta’usa’olotoina mai le pule a le agasala. O la Paulo i le ‘au fa’atuatua i Roma, o le mitamita i le Atua ina ua fa’atuatua i lona alofa tunoa; e tupu ai le onosa’i i puapuaga, o le onosa’i e tupu ai le mautinoa, o le mautinoa e tupu ai le fa’amoemoe, o le fa’amoemoe e lē ma ai pe solomuli i se mea e tasi, auā ua mautinoa, o le Atua o lolo talitonu ma ifo i ai, o le Atua lava o le alofa tunoa.

UPU FA’AI’U - O le feau mo tatou tupulaga talavou mo lenei Eseta, o le toe fa’amanatu ma fa’amautu ia i tatou uma, afai e mitamita i tatou – ia mitamita lava tau o le alofa tunoa o le Atua. Ae aua lava i mea leaga o le lalolagi ma ona tu’inanauga ua pau’u i ai le tele o tupulaga. O le Atua o le alofa tunoa ma te lē tu’ulafoa’i ia i tatou. Tusa lava po o fea tatou te aga’i i ai, e fa’atasi mai lava ia i tatou. O le Atua i lona Alofa Tunoa, e muamua e mulimuli foi, e tausi i tatou lana fanau fa’atuatua.

GALUEGA FAATINO – FESILI

1. Pe fa’apefea ona tatou maua le alofa tunoa o le Atua?
Ua uma ona maliu Iesu mo i tatou, o le fa’ailoga lea o lona alofa tunoa ua fa’asafua mo tagata uma. Pau le mea e ta’uamiotonuina ai i tatou i lana silafaga, o le fa’atuatua ma talia o ia i le loto salamō fa’amaoni.
2. Afai o le alofa tunoa o le Atua, e mo tagata uma, o le alofa e lē fa’atuaia, ae fa’apefea la tagata e lē talitonu i le Atua ae fai mea lelei? E talia i latou i le fa’aolataga?
 - O le Atua e alofa i so’o se tagata. Ua tatou fai mai e leaga Pai ma Lafai, o Tui ma Seve, ona ua tatou manatu e leaga. Ae a tatou fesili ia i latou ia, e tonu lava ma sa’o fa’ai’uga ua latou faia i o latou lava manatu. O lona uiga, o le talia ma le lē talia, o lo’o i le Atua fa’amasino tonu.
3. O le a se tali atu a tagata Kerisiano i tagata e lē talitonu i le Atua ae latou te faia galuega alofa? Tatou te tu’ulafoai ia i latou pe leai?
 - E lē tatau ona tu’ulafoai ia i latou, o le tatou galuega o le taumafai e aumai i totonu o e mafutaga o le ‘au faatuatua. Afai e fai atu ae lē ano mai, ia aua nei fiu le galuega alofa, taumafai pea, e sau lava le aso e tali mai ai le Atua i le galuega lelei o lo’o e faia i le alofa.

FA’AI’UGA – O le alofa tunoa o le Atua, e tu’u avanoa ai ina ia salamō le tagata ma ia iloa le Keriso Toetu.

Fesili fa’atupu manatu - O le a sau mea ua fai mo le Atua ma lona alofa tunoa ia i tatou uma, aemaise lava o tupulaga ulavavale ma lē ava i le Atua.? Ua liliuina moni ea oe i le Fa’aolataga a le Atua, e ala i lona alofa tunoa tele?

MANUIA LE ESETA



ASO SA – APERILA 27, 2025 “FAATALATALANOAGA”

MATAUPU - “UA OGE GATAIFALE O KALILAIA”

TUSI FAITAU – LUKA – 5: 4 – 11

FA’ATOMUAGA – O le tele o le galuega folafola a Iesu, o lo o taua ai le nu’u o Kalilaia, aemaise o le vai, e pei ona fa’aaogaina ai va’a fagota e folafola mai ai lona finagalo, a’o fa’alogologo le motu o tagata. Peita’i, o le molimau a Luka, e iai le aso ua tigāina ai Simona ma le ‘au fai faiva e fagogota i le vai o Kalilaia, ua matuā leai lava se i’a po o se figota na maua ai. **O le fesili - aiseā ua oge ai le gataifale o Kalilaia?**

FESOASOANI MO LE MATAUPU – I le gsologa o le olaga o aso uma, e iai lava mafua’aga e ‘asa ai faiva o tautai o le gataifale.

- Ua leaga mea fagota
- Ua leaga le tau
- Tapa tautali le tapuaiga
- Lē lava le malosia o le tagata fagota
- Ua fa’aleagaina le gataifale i lapisi ma vaila’au o’ona
- Ma nisi mafua’aga e fa’ailoa ane e tupulaga.

E mafai ona feso’ota’i mafua’aga ia i le ‘asa o le faiva o Peteru ma tagata fagogota o Kalilaia. E pei ona ta’utino Peteru - **ua alu le po o tigāina, e leai ma se i’a o maua.** E foliga i le tala a Peteru e le’i fa’atasi pe fa’alua ona lafo le upega i le vai. E lē taumate foi ua so’o atoa le vai o Kalilaia o fagogota ai, peita’i, ua matuā leai lava ma se i’a. O foliga manino ia, ua oge le gataifale o Kalilaia. A’o tala fa’amauina, i le vai o Kalilaia, o le vaituloto e tele i’a e maua ai. O le vai e tafe mai loritana i le tasi pitovai, ae toe tafe ese i le isi pitovai. O le vai e masani ona fagogota ai tagata nofo latalata ane i le vai – Kenesareta, Tiperia, Kalilaia. Ua igoa, o le vai o Kinereta – Numera: 34 – 11. O le mafua’aga lea o le eseese o igoa o le vai i isi tusitusigs ona o nu’u o lo’o latalata ane i le vai. A o le ta’utinoga a Peteru, ua matuā leai, leai lava se i’a e maua. O lona uiga ua oge le gataifale o Kalilaia.

O lo’o fesiligia i manatu o le ‘au su’esu’e le sa’o o lenei fa’aupuga a Peteru, auā o Peteru foi o le tagata faifaiva. Peita’i, o le fa’ai’uga o upu a Peteru, o lo’o fa’apea ai – **ae ona o lau fetalaiga, ou te tu’u ifo ai le upega i le loloto**” O upu ia ua iloa ai le fa’atuatua o Peteru ia Iesu. Ua gata lona iloa fa’afaifaiva o le vai i Kalilaia, ae ua usita’i ia Iesu i lana fetalaiga.

O le molimau a le Tusi Paia, na tali gogoto va’a i le tele o i’a. Ua lē gata o le va’a o Peteru, ae ua lolofi ane foi isi faifaiva ua tusa’e le tele o le i’a.

O NISI O A’OA’OGA MAI LE TALA

1. Aua le fiu gofie a ia lava le onosa’i. – E le’i ‘augatā Peteru e tali le mana’o o Iesu ina ia fa’aaoga lona va’a mo lana galuega folafola, a o fa’alogologo atu tagata i le pa’u matū. Semanū e lē maua ia fa’amanuiaga pe ana te’ena le mana’o o le Alii, pe musu foi ona ua alu le po o fagogota e leai ma se i’a na maua.
2. Ia fa’atuatua i le Atua. – O le fa’atuatua o Peteru na ia maua ai i’a e tele. Fai mai ana upu, ua alu le po o tigāina e leai ni i’a, ae ona o lau fetalaiga, ou te tu’u ifo ai le upega i le loloto. Ua gata le malosi o Peteru, ae ua fa’aatoatoa e le manao o Iesu.
3. Fa’alogo ma usita’i ia Iesu e maua ai fa’amanuiaga e tele. Mai le ‘asa o le faiva i le po atoa, aga’i atu i le tele o le i’a i sina taimi itiiti na usita’i ai, o se matuā vavega tele lava. O le fa’amanuiaga o le tagata fa’alogo ma usita’i i le Atua, e fiu e tufi tufao ma la’u fa’amanuiaga. Ua tali gogoto va’a, ma ua tali masaesae o latou upega.
4. O le Atua e fa’atumuina le gaogao o le tagata. – **O le oge ma le mativa o le gataifale o Kalilaia, e mafai ona fa’atusa i ai lo tatou gaogao ma le mativa fa’ale Agaga. Ae afai tatou te fa’amoemoe ma usita’i ma faalogo i le Alii. Na te fa’atumuina mai i tatou i lona agaga, tatou te tamāoaiga lava i lona agaga e fa’avavau.**

GALUEGA FAATINO –

1. Faitau le tala filifilia ma fa’asoa pe aiseā ua ‘asa ai le faiva o Peteru. Mafaufau i nei aso ma mafua’aga e ‘asa ai o tatou faiva.
2. Ia fa’asoa po o a ni a’oa’oga taua mo tupulaga e maua mai i le tala ia Simona ma le upega i le loloto.

UPU FA’AI’U – O le Atua na te fa’atumu lo tatou gaogao ma le lē iloa o se mea. Pau le tatou tali e fai, ia pei o Peteru, a ona o lau fetalaiga ou te tu’u ifo ai le upega i le loloto. E le’i toe manatu Peteru i sona iloa fa’afaifaiva o Kalilaia, ae ua fa’atuatua ma fa’amoemoe ia Iesu, lea ua tele i’a o le faiva. O so tatou fa’atauva’a, e tupu le malosi ma maua le iloa ona o Iesu. Ua lē toe oge le vai o Kalilaia, ona o le mana o Iesu.

Fesili . Fa’amata e mafai e lou talavou ona fa’atumu le oge fa’ale-agaga o nisi tupulaga ina ia maua tagata mo le Atua. O le a sou taofi?

MALO LE FA’ASOA, FA’AFETAI LE ONOSA’I

////////////////////////////////////

ASO SA – ME 04, 2025 “FAATAATALANOAGA I LE TUSI PAIA”

MATAUPU – “O IESU MA LE ALAFU TAUMATAU, OFUTINO, MA LE MAILA E TASI”

MATAIO – 5: 39 - 41

FESOASOANI MO LE MATAUPU –

O le amtaga o le mataupu e 5, o lo o manino ai le tulaga mafatia o lo o i ai nisi o tagata o le sosaiete. (f: 3 – f: 11), o le lauga fa’aamuia o lo o faia a le Alii, ua fai ma vaila’au fa’ate’a tigā i

loto, ona o sauaga o lo o faia fa'asaga i tagata lē taualoa. O lo'o manino i le lauga a Iesu, o lona finagalo e fa'amāmā le 'avega ma taumafai e tafiese faiga fa'aitu'au o lo'o faia e tagata taualoa. O fuaiupu ua filifilia mo le tatou mataupu i lenei afiafi, o lo'o talanoa ai Iesu i nisi o fa'atinoga o lo'o aliali ai nisi o fa'atinoga o lo'o taotaomia ai tagata vaivai o le sosaiete.

Fetalai Iesu – **“Aua ne'i o outou tete'e atu i le leaga, ai se po mai i lou alafau taumatau, ia e liliu atu ia te ia le isi.”** E lē faigofie ona fa'atino le po – (strike) – open handed slap, i le alafau taumatau ona o mafua'aga nei.

1. Afai o le alafau taumatau e tatau ona po, o lona uiga e tatau ona fa'aaoga le lima agavale. Peita'i, o le lima agavale i tu ma aga fa'a - lutaia, na o galuega lava ua ta'ua o - galuega lē mamā (unclean tasks), e fa'aaoga ai le lima agavale. O lona uiga, e fa'ailoga fesili le po o le itu taumatau e fa'aaoga ai le lima agavale, pei ona saunoa ai Iesu.
2. O lo'o taua e Iesu le po – open handed slap i le itu taumatau, peita'i, e mafai foi ona fa'aaoga ai le tu'i – closed fist, e fa'ao'o ai se manu'a i le auauna/ pologa/to'alua, po o so'o se isi e lē taualoa. Peita'i, o le taimi lava foi lea e fa'aaoga ai le tu'i, o le taimi lava foi lea ua tulaga tutusa ai i laua – le tagata o lo o faia le sauaga ma lē o lo'o sauaina. E lē gata e tulaga tutusa i aiā tatau fa'ale- tagata soifua, ae fa'apea foi ma isi vaega o le soifuaga e aofia ai. (fanau, suafa, vaega o le tamāoaiga ma isi). O lona uiga e fa'ailoga fesili foi le fai o ia uiga e le matai/ pule/ po o se tagata taualoa aga'i i le tagata lē taualoa. O le finagalo o Iesu, e leai se matai e manatu e tulaga tutusa ma sana pologa. O lona uiga, e ao lava ona toe mafaufau muamua, a'o le'i faia se gaoioiga.
3. Na pau lava le gaoioiga lea e avanoa mai mo matai, o le fa'aaoga loa o le tuālima. – back handed strike i lona lima taumatau. O le fa'aaogaina o le tuālima, o se tasi lea vaega ogaoga o le sauāina o so'o se tagata na atagia i lea foi vaitau. O le fa'amoemoe e lē gata ina ia fa'amanu'alia ai le isi tagata, ae ia matuā fa'alumaina ai le isi uso a tagata.

*I le finagalo o Iesu, e faigata ona fa'atino lea gaoioiga o le po o le itu taumatau, Afai foi e tupu, o se matuā fiafiaga tele lea i le tagata ua sauāina, auā o le a tulaga tutusa ai ma lē ua faia sauaga ia te ia. O lo'o i ai le isi talitonuga, o le liliu o le isi itu i le tagata pe afai e po mai lou itu taumatau., e lē o le liliu mai ia toe po, ae o le fa'amoemoe, **ia e alu ese.** O lou liliu ese, o lou savali ese, ua e talia le po ia te oe, ae ua e manatu e fa'amagalo ma savali ese.*

f: 40 – O lē fia fai se fa'amasinoga ma oe e ave lou ofu tino, ia e tu'u atu foi iai ma lou ofu tele.

O ofu tino po'o ofu tele i le tu fa'a - lutaia e mafai ona tu'u fa'a-fa'atau po'o se fa'amau – pledge (Esoto 22: 26 – 27), mo se nonōga tupe. O tagata matitiva ma vaivai i le tamāoaiga, o i latou ia latou te faia lea amio o le 'ave o ofu tino e fai ma fa'amau o se nonōgatupe mai se tagata mauo'a. A o'o ina fa'aletonu le totogiina o le aitalafu, ona molitu lea e le tagata mauo'a le tagata mativa i le fa'amasinoga, ina ia fa'atulafono ai le fa'aaoga o le ofu tino sa fai ma fa'amau pledge, e totogi ai le aitalafu. Fai mai Iesu, a fai se fa'amasinoga e ave lou ofutino, ia e tu'u atu i ai ma lou ofu tele. O le fa'ailoga o le mativa, ua toe lava o le ofu o lo'o pipi'i i le pa'u, a'o le tagata mauo'a, o lo'o tele ana o'a, a'o leni lava ua tulituliaupu leni aitalafu a le mativa ai.

O le isi talitonuga fa'a-lutaia, o le tutula'i telenoa (tulou) o le tagata mativa i luma o le fa'amasinoga, o se matuā maasiasi lea mo le tagata na faia le moliaga. E lē fa'alumaina la le tagata mativa, ae o le a fa'alumaina le tagata mauo'a ma tagata o lo'o molimau i le fa'amasinoga ona o nei va'aiga lē alofa ua latou fai. E leai se finagalo o Iesu e fa'asā ona toe totogi le aitalafu, e tatau lava ona totogi, ae tatau ona fa'amuamua le va'ai alofa i le tagata mativa, i lo o tupe.

f: 41. Ai se na te tauanau mai lua te o ma ia i le maila e tasi, inā o ia oulua ma ia i maila e lua.

O pulega a fitafita Roma mo pagota latou te ave fa'atagata o taua, e aofia ai le fa'amalosia/fa'atauanau o le pagota e amo 'ato o au'upega mo le maila e tasi. Afai e ova atu maila e savalia e le pagota ma le tasi, o lona uiga o le a fa'asala le fitafita e lona ta'ita'i pe afai e molimauina ia faiga. O la Iesu, afai e fa'amalosi ane oe te lua o i le maila e tasi, ia e onosa'i ma fa'amalosi. Afai e taunu'u i le maila e tasi, ia e fa'ailoa i le fitafita o lo'o lava lou malosi mo le isi maila e manatu i ai. A o le mea ua mautinoa, e lē mafaia e le fitafita ona faia o lea tulaga. **Pau le feau ua momoli i le fitafita, o lo'o lava le malosi o le tagata pologa e fa'asala ai le fitafita.**

E lē o iai lava se finagalo o Iesu, ia fa'alumaina le tagata taualoa, po o matai i fa'atinoga o lo'o ia faia. Ae o lo'o tulimata'i e Iesu le loto ia vave ona lagona e le tagata mauo'a/taualoa ma ia fai ai loa se suiga o le va nonofo ma lona uso mativa, tagata pologa ma le tagata lē taualoa. Ia maua le fealofani i tagata uma o le sosaiete.

GALUEGA FAATINO –

Fa'atalatalanoa muamua le mataupu ma le Autalavou i le fesili i ai. – Po o le a sa latou fa'auigaina o ia fuaiupu sa fa'alogu muamua i ai?

A ma'ea, ona fa'asoa loa lea le mataupu isi fesoasoani ua tu'uina atu e tatala atili ai la tatou mataupu, ma fai se a'oa'oga fa'atatau i tupulaga fia malolosi ma le malo vale ua tele ai misa i aoga.

Se saunoaga a lau Susuga a le Fa'afeagaiga e aofa'i ai le mataupu ma se feau fa'amalosi mo tupulaga fia tauimasui i aso nei, ona o le fia toa faavalevlea ma le fa'alialia vale.

MANUIA LE FETUFA'AIGA, FA'AFETAI LE FA'AMALOLOS

////////////////////////////////////

ASO SA – ME 11, 2025 “ASO SA O TINA”

MATUPU – “O ULUAI AVEFEAU OLE TALALELEI – O TINĀ”

TUSI FAITAU – LUKA – 24: 1 – 12

UPU TOMUA – O le Aso Sa o Tinā, o se aso e toe manatua ma toe fa'amanatu ai le sao taua o tinā i so o se fa'alapotopotoga o aiga, nu'u ma fale faigaluega, Aoga, Ekalesia ma so'o se mea lava o ta'uta'u ai tinā. E lē itiiti foi le sao o Tinā i le Talalelei e pei ona iloa i tala o le Tusi Paia. O le matupu filifilia o lenei afiafi, o le toe fa'amanatu ia i tatou uma, aemaise lava o le ituvai o

tamaita’i talavou, O uluai avefeau o le Talalelei, o tinā. Auā o i latou ia e avea ma tinā i le lumana’i ma le auaunaga i le Ekalesia ma le lotu.

FESOASOANI MO LE MATAUPU –

O le tasi lenei o mataupu o lo’o vāvāo ai le to’atele ona o lo’o fetosoa’iina fa’apa’u tolo a loi i manatu o nisi o le ‘au su’esu’e o le Tusi Paia, ona e talia gata i nisi le tulaga i le avea ai o tinā na mua’i o’o i le tu’ugamau, ma le fa’aaliga na latou iloa e uiga ia Iesu, ua toetu mai nai e ua oti, o ulua’i avefeau ia o le Talalelei. Aemaise lava ona o le tele o tala o le Tusi Paia, o lo’o matilatila ai le pulea e le gagana fa’a – alii o le sosaiete o lo’o soifua ai tagata. O le isi tulaga, o le aganu’u fa’a-lutaia e lē fa’atauaina ai le tulaga o fafine ma tamaiti, ae tu matila ai le tulaga o alii ma tama i lea vaitau.

E i ai le taofi o le a aga’i se manatu i le eseese o molimau a le ‘au faievagalia e uiga i le tala o le toetu mai o Iesu nai e ua oti. O le a tulituliloa lava le molimau a Luka e pei ona fa’amauiina i le mataupu e 24: 1 – 12. O lenei tala ua fai ma tala fa’a – fa’agogo i taliga o le ‘au kerisiano, auā o tausaga uma lava tatou te manatunatu ai i le fa’aolataga na faia e Iesu mo le lalolagi. E mafai foi ona tatou fa’apea ifo, o se tala fa’asolopito ia Palesitina ma tagata lutaia. Ae i ai le manatu e lē mafai ona tu’ua ai i lalo le taua o Iesu ma le fa’aolataga na ia saunia.

Peita’i, atonu ua tatou masani ai foi, ona o le tulaga o le fa’amanatu i tausaga uma. O se va’aiga ua fai ma tulaga ua la’aloe ai foi le tatou va’ai i le taua foi o nei tinā ma le latou galuega sa fa’atino, aemaise lava i le tulaga fa’aave – feau. O latou foliga ma o latou fofoga na mua’i fa’aleoina ai le toetu mai o Iesu, e pei ona fa’ailoa mai i le upu **“fa’amatala”** (Luka – 24 :9 – 10). I le fuaiupu e 9, o lo’o molimau, o i latou lava ia na toe foi mai i le tu’ugamau na latou toe fa’amatala mea uma na fa’ailoa ane e agelu ia i latou i le tu’ugamau i le to’asefulu ma le to’atasi o le ‘au so’o ma i latou na i ai.

O TINĀ E TO’ATOLU – O Maria le Makatala ma loana, o lo’o fa’amauiina i le mataupu 8: 2, o i laua ia sa i ai fa’atasi ma fafine mama’i, a’o i ai Iesu i lana galuega tala’i. O Maria le Makatala, na tulia ese e Iesu agaga leaga po o temoni e to’afitu mai ia te ia. A o loana, o le avā a Kusa le auauna pule a Herota le tupu, ia ma Maria le tinā o lakopo.

f: 1 – O lo’o fa’amatalaina ai tapenaga na tapena ai nei tinā ina ia asi ai le tu’ugamau. O mea manogi e pei ona taua, o lo’o fa’amatalaina o **u’u manogi**. O le tasi lenei o tu ma aga masani i Palesitina, **ina ia u’u ai le tino maliu pe a po lua i le tu’ugamau**. O se gaoioiga e fa’atino ai le galuega alofa mulimuli a tinā mo i latou ua maliliu. O se gaoioiga ua talafeagai ma le feau na auina mai agelu e fa’ailoa atu i tinā nei, ina ia logoina le ‘au so’o.

O le Talalelei o le toetu mai o Iesu Keriso, ma o le Talalelei foi lea latou te tala’i atu, e tusa ma lo latou vala’auina fa’a – Aposetolo.

E i ai le taofi e i ai le eseese i le tu ma le aga masani i tinā nei ma le latou galuega fa’atino i le taeao segisegi, ma le **faitau** ua masani ai i tatou i taimi o maliu. E talitonu le lagona, ona o le tu ma le aga fa’ale- talalelei e pei ona ao ai Samoa, lea ua fa’atino ai lea tiute e le itupa o tinā. Ua o gatasi ai ma le lagona o le galuega mulimuli lea i toe sa’afiafiga e aualofa ai i lē ua maliu ma lona aiga.

‘AU SO’O - e lē o manino mai i le tala a Luka pe aiseā na lē asia ai e le ‘au so’o le tu’ugamau, ae asi e tinā. Peitai, a tatou va’ava’ai i tu ma aga fa’a – lutaia i ia ona po, ma le si’osi’omaga na soifua ai nei tagata i na vaitau, ona ta’atia mai ai lea o se va’aiga manino i lea tulaga.

“O le asi o le tu’ugamau, o lo’o fa’amauina i tala tu’u fa’a- lutaia, o galuega ia e feagai ma patino lava i tinā. A tu’u foi i le si’osi’omaga o lea vaitau, o lo’o fa’amalumalu le pule sauā a Roma, ma o le fa’asalaga fa’a- Roma lea na fa’asala ai Iesu. O lona uiga, e fai o lo latou tausii i tu ma aga fa’a – lutaia, a’o le fefefe foi ia Roma ma a latou puleaga, nei o latou oti ai. O le ata manino lea o lo latou fa’apopototo fa’atasi ona o latou fefefe, auā na fa’afiti Peteru na te lē iloa lea tagata, ina ne’i iloa ona nofo sala lea i le fa’asalaga lava lea e tasi e pei ona fai i le Alii Fa’aola.

FESILI E FA’ASOA AI –

1. O le a le taua o le asi o le tu’ugamau i mea manogi i le va’ai fa’a – lutaia?
2. E i ai se feso’ota’iga o le asi o le tu’ugamau e tinā o le tusi faitau ma le faiteu ua masani ai tatou i taimi o maliu. (‘ie laise ma le teu, ta’aiga ‘ie, ietoga, tupe)
3. Aiseā na lē asia ai e so’o le tu’ugamau ae asi e tinā?
4. O le a se manatu o le itupa o tama’ita’i ma tinā i le avea ai o i latou ma ulua’i molimau i le toetu o Iesu?
5. O se galuega e tatau ona fa’aauau ma fa’ataua tinā pe leai? Aisea?

MANATU FA’AI’U –

Aua le fefe e fa’ailoa le tala moni ona o le tulafono, ia pe manatu foi e maua ai se lanu i isi tagata. Manatua e sili le alofa i mea uma.

MANUIA TELE LE ASO SA O TINĀ



ASO SA – ME 18, 2025 “SU’ESU’EGA I LE TUSI PAIA”

MATAUPU – “MULIMULI I LOU FETU”

TUSI FAITAU – MATAIO – 2: 7 – 15

UPU TOMUA – O ai lou fetu? O lou tamā po’o lou tinā? O le Faifeau po’o se isi tagata ua e manatu e te fa’ata’ita’i i ai? O le taofi, a sa’o le fetu e te mulimuli i ai, ua e maua foi manuia o le Atua. Ae a sesē, ona taumate foi lea o lona taunu’uga.

FESOASOANI MO LE MATAUPU – MATAIO – 2: 7 – 15

O le tala i le malaga a le ‘au makoi, na tā’ita’iina e le fetu ua pupula mai sasa’e. O le upu makoi o lo’o fa’aliliuina – wise men – o lo’o fa’amatalaina o tagata atamamai i le fa’auigaina o va’aiga eseese o le vanimonimo ma lo latou so’otaga i le si’osi’omaga o aso uma.

O le fesili e fa’atupu manatu – Fa’amata e lē o iai se isi malosii o lo’o i tua atu, o lo’o u’unaia le ‘au makoi e mulimuli i le fetu ua latou iloa? E fautuaina ia tu’u muamua le avanoa i le Autalavou e fa’ailoa ai ni o latou lagona, ona amata lea o le fetufa’aiga.?

O si o ta manatu i le fesili - O le agaga o le Atua. E fa'apefea la ona iloa le Agaga o le Atua i le mulimuli ai o le 'au makoi i le fetu ua latou iloa.

1. O le fanau mai o Iesu, o se galuega na amata mea ai le Agaga o le Atua. Mai lava i le valoaga ia Maria ma Iosefa, seia oio mai lava i le malaga a le 'au Makoi, o mea uma ia o lo'o ta'ita'i ai le Agaga o le Atua.
2. O Herota o le tupu o le n'uu i le vaitau lea na fanau ai Iesu, a'o le fuaiupu e 7 – 8, o lo'o manino ai, e lē o iloa e Herota le fanau mai o Iesu. O Herota foi, na fai lana fa'atonuga i le 'au makoi, a maua le nofoaga o fanau ai Iesu, ia toe foi ane e fa'ailoa atu, se'i alu ane e ifo i ai ma avatu sana meaalofa. O le Agaga o le Atua, na fa'aali i le 'au makoi e aua ne'i toe foi ia Herota.
3. O makoi o tagata atamamai, sa mulimuli foi ma le loto fiafia i le fetu. O lo'o manino lava i le tala, e le'i fa'alotolotolua le 'au makoi e ulufale i le fale o manu e saili le tupu o tagata lutaia, e ui o lea ua iloa, o le fale ua fa'asino mai e le fetu ua latou iloa. Peita'i, e leai, na ulufale ma le fiafia ua ofoina a latou meaalofa taugatā ma le anagatā.

A o le fesili, ana o tatou i lenei vaitau, fa'amata tatou te talia le fanau mai o Iesu le fa'aola o le lalolagi i se fale o manu? Fa'amata tatou te mulimuli pea i le fetu pe leai?

- E tatau lava ona i ai le tu'u fesili, peita'i, o le fua manino ia o le mulimuli ma le fa'atuatua i le fetu ua iloa. Tusa lava pe fale o manu pe fale matagā I le va'ai, e talitonu pea i le fetu ua fai ma fa'asino ala. O le isi lea fa'afitauli o aso nei, tatou te mulimuli lava i le fetu i taimi o le lelei, ae o'o mai loa faigatā, ona vave a lea ona tatou tau mamao mai le fetu.

Tala ia Simona Peteru ma lona fetu –

(Mataio – 26: 69 – 75, Mareko – 14: 66 – 72, Luka – 22: 54 – 62, Ioane – 18: 25 – 27)

- O Simona Peteru o le so'o na mua'i vala'uina e Iesu e fai ma so'o. O lo'o molimau foi le Tusi Paia o le mafuataga a Iesu ma Simona, o se mafutaga e mafanafana tele. O mea uma foi e finagalo le Alii e fa'ailoa i lona 'au so'o, e tatau lava ona i ai ma Peteru. Peita'i, na iloga le te'ena e Simona o lona fetu ina ua o'o i puapuaga. **“OU TE LĒ ILOA LENA TAGATA”**. Ua fa'agalalo ma te'ena le fetu sa fai ma ta'iala i le ola, ona o le fefe i puapuaga. “Ae a tatou le tupulaga talavou, E lē o i ai ni lagona musuā po o ni lagona fa'asausili i matua ona o le poto ma le tamāoaiga ua maua? Afai o iai, o le fautauga e lelei ona tia'i 'ese loa ma salamō i na lagona. Ae afai e leai, lelei tele ma ia fa'aauau ai pea lona lelei ma fesoasoani atu i tupulaga ua sesē fetu ua mulimuli atu iai.

- **GALUEGA – 2** – o lo'o fa'amauiina ai le toe tula'i mai o Simona e fa'aauau lona mulimuli i lona fetu ina ua maua le fa'au'uga a le Agaga Paia o le Atua, e pei ona 'auina ifo i le Aso Penetekoso. O lenei soifuaga, e iai lava vaivaiga fa'ale- tagata e lē atoatoa ai ona tatou mulimuli i fa'amanuiaga ua tatou tulimata'i o lenei olaga. O ai foi ua tatou filifili e fai ma fetu ta'iala i lo tatou ola vala'uina, o le mea mautinoa e leai a se isi e atoatoa. Ua na o Iesu le FETU SILI tatou te mulimuli iai.
- O le mau tauave a le Autalavou, **IA OLA TAUTUA FA'AMAONI MO KERISO**, O le fetu lona e fai ma ta'iala i le tatou malaga fa'ale- fa'atuatua fa'atalavou o lo'o faia nei.

GALUEGA FA'ATINO – FA'ASOA

Nisi nei o fetu va'aia ma pupula pea ua filifilia e fai ai le talanoaga a le mafutaga – Faifeau, tamā, tinā, uso, tuafafine, tuagane, to'alua ma isi.

FESILI – Fa'amata e te tumau pea i le fetu ua e filifilia pe a o'o mai faigata o le olaga? Ae aiseā na e filifilia ai lena tagata e fai ma ou fetu?

“Tupulaga, fa'amata e mafai ona avea oe ma fetu e lolofi atu i ai nisi tupulaga e mulimuli atu ia te oe, pe leai? Aua le susulu fa'afoliga.

AOTELEGA O LE MATUAPU –

Ua tele fetu ua fepulafi mai i le ala, ae o le fa'amamafa, ia sa'o le fetu e te filifili i ai. **O IESU, LE FETU SILI I FETU UMA TATOU TE MULIMULI IAI”**

MANUIA LE AFIAFI, MALO LE ONAOSA'I

////////////////////////////////////

ASO SA – ME 25, 2025 “FINAUGA” (Debate)

MATAUPU – PAU LAVA O LE FOA'I A LE ALII” – E sa'o pe sesē?

FA'ATOMUAGA –

O le tasi lenei o fuaitau o lo'o lagolagoina i le tele o fa'alavelave fai i totonu o le atunu'u. O upu e fa'ai'u ai ni felafolafoaiga i taimi o fa'aaloaloga ma saofaga o mea nei o fa'alavelave **“Pau lava o le foa'i a le Alii, auā lenei aso ma lo tatou fa'alavelave.”** E leai se fa'amoemoe o le fa'asoa e fa'asesē pe fa'asa'o le manatu, ae ua manatu e lelei foi ona tatou asia se lagona o tupulaga auā ua latou fa'alogo ma va'ai i ai i le fa'aaogaina o lea fuaitau, aemaise e tapena ai ni o latou manatu ina ia tula'i mai i le tausiga o aiga ma le Ekalesia ae na tau ane ai i latou. O le mataupu la o le afiaif nei, o le fa'asoa e ala i le finauga, po o se fuaitau e sa'o lenei fuaitau pe leai foi. E lē sailia i le fa'asoa po'o ai e malosi lana finau po'o ai foi e malo, leai. e taua i le mataupu manatu e fa'asoa, ae lē fa'aleaogaina fua manatu o le isi, ae sasa'a le taofi o le talavou lava ia.

FESOASOANI MO LE MATAUPU –

ITU LAGOLAGO – E MAFAI ONA SA'O LEA FA'AUPUGA ONA O MAFUA'AGA NEI –

- 1. O AIGA E VAIVAI LE TAMĀOAIGA** – A tutupu ni fa'alavelave i o tatou aiga, e iloga lava paolo e lima vaivai, e iloa foi le paolo e lava le tamāoaiga. Afai e fai atu e le paolo lima vaivai ia upu: Pau lava o le foa'i a le Alii, e talia gofie auā e sa'o ma fa'amaoni, o mea lava ua gata ai le mafai. Peita'i, a fai ese aiga e lava le tamāoaiga, ona mautinoa lea, ua lē sa'o. Ua fai ma 'alofaga o le fai aiga leaga.

- 2. MATIVA ONA O MEA TUTUPU I LE OLAGA – (Conditional poverty)**

E lua ituaiga mativa o lo'o i ai i le lalolagi lenei, **1.** O le mativa ona o mea tutupu – (condition poverty) – ma le **2.** mativa e tu'ufa'asolo i augatupulaga (generational poverty). O le conditional poverty – e aofia ai fa'ama'i (misela/koviti – 19 ma isi). O mea tutupu e pei o - natural disaster – matagi , lologa, tsunami ma isi , o mea e tutupu i le

olaga. (Social, cultural, everyday issues). O fa'afitauli uma ia ua tutupu ua mafua ai ona fa'aletonu alagā tupe (income) a tagata. Peita'i, e i ai le taimi e toe lelei ai ona toe foi lea i le mea sa i ai muamua. O itu ia e mafai ai ona sa'o ia upu. O le aiga sa tamāoaiga, ae ua a'afia mea uma ona o le matagi po o ni lologa, ole mafua'aga lena ua fa'aletonu ai le fa'asoa.

3. **TELE ISI FAALAVELAVE** – E mafai ona tasi, lua i le tolu fa'alavelave e tutupu i le taimi e tasi ma a'afia ai i tatou. O fa'alavelave fa'ale- aiga, o mea fai a le lotu, o le tausiga o le aiga, ma mea fai mo le fanau. O mea uma ia e mafai ona a'afia ai le fa'asoa, ona sa'o lea o le upu – Pau lava o le foa'i a le Alii.
4. **UA OGE TAGATA AIGA (Ausage)** – O nisi aiga e tele fanua e maua ai le tamāoaiga, peita'i, ua ausage le aiga, ua leai ni tagata e galueaina ma fa'aaogaina le laueleele.

ITU TETE'E – LEAI E LĒ SA'O IA UPU ONA O MAFUA'AGA NEI –

1. **E LĒ FA'AKERISIANO IA UPU – Pau lava o le foa'i a le Alii.**

O upu o lo'o tu'ua'ia ai le Atua i mea ua maua. E peisea'i na o le pau ia o mea na sau le Atua ma foa'i mai i o latou lima. Peita'i, o lo'o manino lava le Tusi Paia – ma molimau foi lenei olaga, o lo'o tele auala o fa'amanuiaga mo tagata o le lalolagi.

2. **O UPU FE'ALO'ALOFA'I** - O upu ua fai ma 'alofaga o le ola paie ma le fai aiga leaga. O mea lava ua maua, o mea na. E leai se agaga e saili se isi mea e fa'asili atu le lelei e ofoina ai le fesoasoani mo isi tagata ua mafatia. E pei ona taua i luga, e sa'o pe afai o se aiga lima vaivai, peita'i, o nei aso, ua matauina, ua tausolomua i e lava le tamāoaiga ona manatu mama lea i fa'alavelave fa'ale- aiga. I le talitonuga, o fa'alavelave e alu ai tupe, ae galo ai mafutaga ma aiga e fa'avavau.

3. **O LO'O TELE MANUIA O LE ATUA, AE UA FA'AVAIVAI LE SAILIGA A LE TAGATA.**

O lo'o molimauina i nei aso, le tele o fanua e lē o galueaina, e ui lava ona o si o tatou motu e tele ai mauga. E i ai foi isi e tele ai taleni eseese pei o le 'oti ulu ua mafuli i ai tupulaga, o le kuka, tusiata, pese ma isi lava taleni, tatou te lē o fa'aaogaina tataua e maua ai nisi tamāoaiga e fesoasoani i le aiga. **MATAIO – 25: 14 – 30, LUKA – 19: 11 – 27.** O le fa'ata'oto a Iesu i e na tu'uina atu i ai taleni e lima ma taleni e lua. Na laua matuā punoa'i e galulue ina ia maua ai se fa'asiliga. Ua ia te'i tatou taleni eseese na foa'ina e le Atua mo i tatou. O lo tatou tiute lea, o le galueaina o nei taleni ina ia maua ai se fa'asiliga ae sili ona vi'ia ai le Atua i lo tatou ola galulue mo le mea sili. O lē na i ai le taleni e tasi, ua eli le lua ma natia ai ae fa'asili lona paie. Na i'u i le aveesea o mea uma sa ia te ia ma tuli i fafo. **MATAIO – 7: 7 – 8-** O lo' o fetalai manino Iesu, ina ia ole atu, ona foa'iina mai lea, ia saili ona maua lea, ia tu'itu'i ona toina mai lea ia te outou. –O le fetalaiga lea a le Alii i uiga o le ola saili o le tagata i le Atua. O le sailiga e lē fa'atasi pe fa'alua ona faia, ae ia matuā saili ma le fa'atuatua. **MATAIO – 6: 25 – 34.** Fetalai manino Iesu, e lē sili le alofa o le Atua i manu ma la'au o le vao i lo o se tagata soifua o le palealii o lana foafoaga. O a'oa'oga nei a Iesu, o lo'o fa'amamafa ai le mua'i saili o le malo o le Atua, i lo o se isi lava mea o le olaga. Auā a maua le Atua, ua maua foi isi mea uma. Ae tataua ona iloa e le tagata, e sili atu le alofa o le Atua ia te ia. O ona uiga, o a mea ua

mo'omia ma mamafa i le mefaufau, saili i le Atua e ala i le tatalo. E fa'asino ma fa'afaigofie e le Atua so o se auala mo oe le tagata fa'atuatua, pe afai e fa'amaoni le loto e fa'amoemoe ai i lona alofa mai. Fetalai Iesu, Aua le popole, la tatou fa'atuatua i lona alofa mai, tatou te ola ma manuia tele ai.

GALUEGA FA'ATINO –

1. O le fa'agasologa masani lava e pei ona i ai fa'asoa fa'apenei o a tatou mataupu.
2. **Fesili** – Fa'amata e mafai e lou talavou ona avea sau taleni ua aumai e le Atua e fai ma ou sao, e u'unaia ai isi tupulaga e fa'aoga tatau taleni, e maua ai manuia mai le Atua, ina ia 'alo ese mai lea upu o le pau a o le mea ua maua?
3. E mafai ona e fa'asoa i tupulaga i se feso'ota'iga o le tatou mataupu ma le soifua faitaulaga o tupulaga?

FA'AI'UGA –

- la saunia pea e lau Susuga a le ta'ita'i se fa'ai'uga lelei mo le mataupu ia malamalama foi tupulaga i o latou manatu ua fa'aalia.
- la manino i tupulaga ina nei manatu na o le pau lea o le foa'i a le Atua e tusa o upu, a'o le fa'afitauli ua vaivai la tatou saili ma le fa'atuatua.
- la fa'amanatu i tupulaga, aua le avea ia upu e fai ma 'alofaga e natia ai le fai aiga leaga ma le paie.
- la mautinoa e tupulaga ia 'alo ese mai le tu'uaia o le Atua ona o le augatā ma le paie e galue.

MANUIA TELE LE FETUFA'AIGA, FA'AFETIA LE FA'AMALOLOSII

////////////////////////////////////

ASO SA – IUNI 01, 2025 “FA'ATALATALANOAGA I LE TUSI PAIA”

MATAUPU – “E LEAI SE MEA OU TE MATIVA AI”

TUSI FAITAU – SALAMO : 23

UPU TOMUA – O le Salamo na tusia e Tavita, o lo'o fa'amauiina ai lona fa'atuatua i le leoleoga malu a le Atua ia te ia ma lona nu'u o Isaraelu. Mai le tele o faigata na ui mai ai le olaga talavou o Tavita, o lana lea tautinoaga. “E leai se mea e mativa ai lona olaga ona o le Atua o lo'o leoleo ia te ia.”

FESOASOANI MO MATAUPU – la fai sina fa'amatalaga pu'upu'u e fa'asoa ai manatu o le Autalavou i le upu **mativa** i le olaga o aso uma, e tomua ai le fa'atalanoaga.

Fa'ata'ita'iga – leai se tupe i le taga, lē lava mea'ai, lē lava le fa'asoa, leai se fiafia , leai se sa'olotoga, mativa i mafauauga, vaivai ma lē iloa se mea.....

O nisi ia o fa'aupuga e mafai ona fa'amatala ai le upu mativa i le soifuaga lenei. A'o le ta'utinoga a Tavita e pei ona fai ma autu o le fa'asoa, **“E LEAI SE MEA OU TE MATIVA AI”**

FESILI FA'ATUPU MANATU – E fa'apefea ona fa'afeso'ota'i le manatu autu ma le gasologa o le soifuaga lenei tatou te ola ai?

SALAMO – 23

- O lo'o i ai lava le talitonuga, o le Salamo e 23, o lo'o fa'amauina ai le agaga fa'afetai po o se vi'iga mai ia Tavita mo lona Atua, ona o le tele o fa'afitauli na o'o i ai lona olaga, peita'i, o lo o sologa lelei pea ma maua le filemu mai le Atua. O lo'o manatu nisi, o le Salamo e 23, o lo'o fa'atatau i le fa'asaoina o le ola o Tavita mai le matamata ita o Saulo, na tulituli solo ai o ia i le vao ma tauau a oti ai. O le saogalemu ua ia maua, e mai le leoleoga malu a le Leoleo mamoe sili.
- **f; 1** – “O le Alii o lo'u leoleo mamoe o ia, e leai se mea out e mativa ai” – Ua fa'atusa e Tavita le mafutaga a le tagata fa'atuatua ma le Atua, i le mamoe ma lona va feagai ai ma le leoleo mamoe, Ua gagana le mamoe i le lelei ma le malu puipuia o lona ola ona o le tausiga a le leoleo mamoe.
- **f; 2** – E leai se taimi e tu'ulafoa'iina ai e le leoleo mamoe lana lafu mamoe, mai lana leoleoga ma lana va'aiga. E tu'u atoatoa foi le malosi i le sailiina o le eleele lafu lemu, o lo'o maua ai le vao lelei ma ni vaipuna, po o ni vaieli foi, e tata'i aga'i i ai le lafu mo le fafagaina ma le fa'ainuina. O le vao mu'a ou te taoto ai. O le vao mu'a, o le vao fou e fiafia i ai mamoe, a o lea fai mai le fai Salamo, e ta'oto ai. O lona uiga, o le ata va'aia o le tausiga ma le puipuiga a le Atua i lana tagata, e saogalemu le tagata talitonu i a'ao agalelei o le Atua. E saili lava e le Atua le vao mu'a e tu'u ai lana tagata, o le mea e manuia ai, ae le o le mea e fano ai.
- **f; 3** – Na te ta'ita'iina foi lana lafu i ala o le amiotonu, o le ala lelei, o le ala tatau ma le ala sa'o – o lona uiga, e le tu'ulafoa'ina pe tu'ufau e le Atua a'o tauivi e fai lona finagalo. E na te fa'afoisia mai lo'u aagaga – pe a o'o ina vaivai le loto o le leoleo mamoe. Fai mai e malulūina i le po, i le leoleoina o lana lafu, o taimi na e tau lagona ai le i'uleo o le fa'avaivai ma le fiu. A o taimi na e fa'afoisia ai e le Atua le agaga o le leoleo mamoe e fa'amalosi pea i taimi o le fa'avaivai.
- **f; 4** – O le Atua foi e malu ai lona ola pe a o'o le savaliga i le tele o faigata i le tele o taimi. O faigata e o'o lava i le oti. Fai mai a o'o ina alu le savaliga a le leoleo mamoe ma lana lafu, o le tala e fa'apea, e a'e i mauga ma ifo i vanu, e fetaia'i ma manu fea'i o le vao. O le molimau a le fai – Salamo, e le fefe lava i se mea leaga, auā foi ua mautinoa lava le fa'atasi mai pea o le Atua ia te ia.
O le la'au ma le to'oto'o – e fa'atatau lava i le to'oto'o e tasi o le leoleo mamoe, e fa'asaoina ai le ola o mamoe. E fai ma au'upega e tutuli ai manu fea'i, ma fai foi ma to'oto'o e ta'ita'iina saogalemu ai mamoe. O le fa'alagolago o le leoleo mamoe i lona to'oto'o, mo ta'ita'iina ma le lavea'iina o mamoe ua fa'apea ona fai ai ma fa'ailoga o le saogalemu. O le mautinoa o le ola ua fa'asaoina ma saogalemu, o se lagona ua fa'amalieina ma fa'amafanafanaina o le loto ma le agaga.
O le mafanafana o le Atua auai mai i mafatiaga o lana fanau fa'atuatua i ituaso pogisa o le ola. Ua na o le Atua lava e mafai ona savavali ma lana fanau i le vanu o le ata o le oti.

O le savali i le vanu o le ata o le oti, o le isi ona uiga e fa'atatau i le faigamalaga a tagata i le atu Palesitina e iai ona vaega maupu'epu'e e a'e i luga, ifo i lalo pe a o'o ina savavali tagata malaga. Fai mai e lafoia lona ata i le la ona pei ai lea o le pogisa lona ataata mai. Lea e fai mai ai le fai – Salamo, ona o le Atua auai mai, e le popole lava i se mea e tasi, e lē fefe auā foi o lo'o fa'amoemoe i le Alii.

F; 5 – O le saunia foi e le Atua o le laoa'i mo lana fanau fa'atuatua, a'o siomia e o latou fili, o se va'aiga sili lea ona fa'amalie loto. O le aganu'u a Sasa'e tutotonu, a vala'auina oe e se uo la te mafuta ma avea ma ana malo, e fa'au'uina i le suau'u e fai ma fa'ailoga o lona saogalemu i taimi uma o le mafutaga. O le suau'u e fonofono ai manu'a o loto ua mafatia. O le mautinoa o le filemu o le Atua i totonu lava o faigata o le ola. O le fa'au'uina lava lea i le suau'u o le alofa tunoa e malu ai i a'ao o le Alii, e leai se leaga e mafai ona afaina ai.

O se isi va'aiga i le fa'au'uina i le suau'u, o le suau'u ua fa'au'uina ai le tupu. O se lagona fiafia ma le fa'agae'etia pe a o'o ina fa'au'uina se tasi e fai ma tupu. E fa'apena se va'ai aga'i i le mafutaga a le tagata ma le Atua pe a o'o ina tumau i le Atua. E fusia i le fiafia ae siva i le olioli, mulimuli ane ua taumasuasua le ipu i fa'amanuiaga sasa'a mai a le Atua, A o'o ina taumasuasua le ipu, ua tumu, ua sasa'a mai i fafo, e fa'apena manuia e fa'apaleina ai le tagata, o manuia e fiu le tagata e tufi taufao ina ua pipi'i le loto i le Atua.

f; 6 – O le uiga lea o le nofo i le fale o le Alii. E tumu i le tamāoaiga, e taumasuasua lau ipu i taimi uma, e tausia foi i le agalelei ma le alofa i aso uma lava e le aunoa. O le agaga atoa lea o Tavita, ina ia manino Isaraelu uma ma tagata uma i le alofa fa'aleoleo mamoe o le Atua, e lā gata ia te ia, a o i latou uma e fa'atuatua i le Atua.

GALUEGA FA'ATINO –

Faitau le Salamo ma fa'asoa e fa'alautele fuaiupu ta'itasi i le uiga ua tu'uina atu ma fesoasoani.

MANATU FA'AI'U

I le va'aiga i le tulaga fa'aleoleo mamoe o le Atua i lo laua va nonofo ai ma Tavita e tusa o le fa'amatalaga e pei ona taua i le Salamo e 23, e fa'apena foi i le va'aiga i le Feagaiga Fou i le tusi a Ioane -10:11 – 18. I le afio mai o Iesu Keriso. O lea foi ua fetalai manino Iesu, o ia lava o le leoleo mamoe lelei, e tu'uina atu lona ola mo mamoe. O le malosi lea ma le mana e mafai ai pea ona feagai le tagata mafatia, ona o le mativa ma faigata e o'o lava i le oti, ae tula'i pea ma molimau "E LEAI SE MEA OU TE MATIVA AI" Auā foi ua talitonu i le Atua alofa na te aumaia le ola ma le manuia i totonu lava o mafatiaga mo lana fanau fa'atuatua. O le alofa fa'aleoleo mamoe lea o le Atua ua molimauina e Ioane i le soifua o Iesu Keriso, lea ua ta'utino lava ia, o ia o le Leoleo Mamoe lelei. O le fa'aogaina e Iesu o le ata o le leoleo mamoe e faatatau ia te ia lava, ua si'itia ai ma le tulaga e malamalama ai le uiga fa'aleoleo mamoe o le Atua.

O le leoleo mamoe ua ofoina atu lona lava soifua atoatoa mo le fa'aolataga o mamoe. O se la'asaga maualuga lava lea o le galuega tele fa'aleoleo mamoe, ua lē gata i le ta'ita'i,

fafaga ma puipei mamoe, a’o lea ua ofoina atu lona ola e fa’aolaina ai mamoe. O le uiga loloto lea o le mataupu – “e leai se mea ou te mativa ai” O le ola atoatoa i le tino , mafaufau ma le agaga, ua fa’aolaina ma fa’amagaloina ona o Iesu le Leoleo Mamoe sili.

MO TUPULAGA – Mafaufau atili pea i mea tutupu i tupulaga ma faigata ua fesouaina ai le olaga, Aisea? o le a sau fesoasoani fa’aleoleo mamoe alofa i ia faigata?

MANUIA LE AFIAFI, ALOFA ATU

////////////////////////////////////

ASO SA – IUNI 08, 2025 “(ASO SA O LE PENETEKOSO)”

MATAUPU – “E LĒ O LE AGAGA O LENEI LALOLAGI, A O LE AGAGA O LE ATUA.”

TUSI FAITAU – I KORINITO – 2: 1 – 13

FA’ATOMUAGA – O le mau tau’ave a le ‘au Kerisiano i le malosiaga e fa’alagolago i ai i so o se taimi, o le agaga o le Atua e taunu’u malosi ai mea uma. O lona uiga o mea uma tatou te faia, e fa’amoemoe lava i le Agaga o le Atua. O le agaga o lenei lalolagi o lo’o talanoa i ai le tatou mataupu, o manatu fa’ale -tagata, ae lē o le finagalo o le Atua.

FESOASOANI MO LE MATAUPU –

O le Ekalesia i Korinito, na fa’atuina e le Aposetolo o Paulo i lana malaga fa’amisionare lona lua. O se tasi o a’ai na ogatotonu i ai fefa’ataua’iga a Asia Itiiti, fa’aaogaina ai lona uafu tele o lo’o i ai. O fefa’ataua’iga i le a’ai o Korinito, na fai ma avanoa o le ofi atu o le tele o tapuaiga eseese ona o tagata eseese mai isi atunu’u ua aumau i totonu o le malo. O se tulaga na fai ma popolega o le Aposetolo o Paulo, ona o le talitonuga fa’akerisiano ua pispisia i le tele o nei tala’iga eseese.

FA’AFITAU LI NA FEAGAI MA LE EKALLESIA –

I le 1. Korinito – 1: 10 – 17, o lo’o manino ai le fa’afitauli o lo o tupu i totonu o le Ekalesia i Korinito. Ua manatu tagata i le poto o upu a Paulo, Apolo, ma Kefa (o Peteru lava lea), ma ua avea ma auala e fevaevaea’i ai, ona ua tu’u le feau o le Talalelei ia Iesu Keriso, ae ua vivi’i e le tagata lava ia le poto o e tala’i e fiafia iai. Ua mitamita tagata i le poto o le tagata ae ua lē mitamita ona o le Talalelei i le alofa tunoa o le Atua e ala ia Iesu Keriso. I KORINITO – 2: 1 – 13 (Tusi Faitau)

1. **f: 1 – 5** – O lo’o tautala Paulo i le amataga o lana galuega i le Ekalesia. E le’i fa’alagolago i se poto fa’ale-tagata, ae na fa’amoemoe i le fa’asinoga a le Agaga Paia ma le mana o le Atua. O le ala lea o lona vaivai auā na manatu i lona fa’atauva’a, o lona mata’u ma lona gatete, o lo’o ia te ia le fefe paia ne’i sesē se upu e gagana atu ai e uiga i le Talalelei ia Iesu Keriso.
2. **f: 6 – 8** – O le faiva fa’a – Aposetolo, o le galuega tautala auā e ta’uta’u ma fa’ailoa atu le Talalelei i le Fa’aolataga na faia e Iesu Keriso. O le uiga lea o le upu a Paulo o latou e tautala atu, o lo’o I le fuaiupu e 6 ma le 7. Peita’i, e gagana i le poto o e ua

a’oa’oina i le Talalelei, po o e ua fa’atuatua ma talitonu ia Iesu. O le malamalama na pupula mai le Atua i le amataga, mai lava i le foafoaga ma fa’asolo mai ai ia Isaraelu ma perofeta seia taunu’u mai i lona atoaga ia Iesu Keriso. O le poto mai le Atua ae lē o le poto o le lalolagi e saili ai i le tamāoaiga ma le pule ina ia ta’uleleia ai i le va’aiga a tagata ma maua ai sona lava vi’iga.

3. **f: 9 – 13** – O le mataupu silisili i le eseese o mea e galue ai le agaga o le Atua mo le tagata, ma le agaga o le lalolagi po o le tagata lava ia. O mea e fa’ailoa mai i le amio a le tagata e tusa ma lona talitonuga, o i tonu lea e mafai ona iloa ai le eseese o mea e fa’ailoa e le Agaga o le Atua ma le agaga o le lalolagi. O le upu a Paulo, o mea sa natia i le tagata e le’i va’aia e mata ma lagona e taliga, na o i latou o e alolofa i le Atua ua latou maua. O le fesili – ***O a ia mea sa natia?*** O le alofa silisili - ese o le Atua ma lana fa’amasinoga amiotonu sa lē iloa e le tagata, a ua fa’ailoa e le Agaga Paia, ona o le fa’aolataga na saunia e Iesu Keriso. O le agaga atoa o lenei faitauga ma upu a Paulo, o le agaga ole Atua na te musumusuina i tatou i mea lilo o lona malo ma tatou maua ai ana fa’amanuiaga e tele. Na te fa’ailoa mai le finagalo o le Atua ma ta’ita’iina i tatou i ala o le amiotonu. Peita’i, o le agaga o lenei lalolagi, na te ta’ita’iina i tatou i mea inosia e tupu ai le agasala ma tatou si’i ai le ta i le Atua ma lona finagalo.

GALUEGA FA’ATINO –

O le mataupu o lenei afiafi, o le a faasoa ai le Autalavou i le tusi faitau ma lona feso’ota’iga i le autu. Fa’aali pea manatu ma lagona o le mafutaga i ni va’aiga faigofie e iloa ai le agaga o lenei lalolagi ma le agaga o le Atua, aemaise lava la o le fa’aupuga lea ua tatou masani ai e fa’apea – **“O le musumusuga lava lea a le Agaga o le Atua ia i tatou”**

FA’AI’UGA – O le mafutaga a le tagata ma le Agaga Paia o le Atua, e tataua ona mausalī ma maua ona o le fesoasoani sili lea mai le Atua. E ta’ita’iina i tatou e le Agaga o le Atua i mea lelei ma le manuia atalī. O mea e va’aia e mata ma tu’inanau iai le loto o le tagata i lenei lalolagi, o mea ia tatou te maua ona o le agaga o lenei lalolagi ma o mea inosia i luma o le silafaga a le Atua.

MANUIA TELE LE ASO SA O LE PENETEKOSO



ASO SA – IUNI 15, 2025 “ASO SA O TAMĀ”

MATAUPU – “O TA’ITA’IGA FAATAMĀ”

FA’ATOMUAGA – O le Aso Sa lenei o tamā I lo tatou atunu’u atoa ma nisi atunu’u o le lalolagi. O le aso e manatua ai pea le sao taua o tamā i totonu o aiga, nu’u, Ekalesia ma le atunu’u. O le mataupu o lenei afiafi, o le sailiili ma fa’asoa i nisi o tamā o lo’o taua i le Tusi Paia a latou ta’ita’iga fa’atamā e saga a’oa’o mai pea mo ta’ita’iga fa’atamā i le olaga lenei tatou te i ai.

FESOAOOSANI MO LE MATAUPU – O NISI O TA’ITA’I ILOGA O LE TUSI PAIA E AOFIA AI –

1. **MOSE** – O ia sa ta’ita’iina le nu’u o Isaraelu. E tigā lava le muimui ma le fa’avaivai o le nu’u ma ona tagata, ae na fa’amalosi lava e ta’ita’i le nu’u seia o’o ina iloa atu Kanana le nu’u folafaoina.

A’OA’OGA MAI LEA TAMĀ – Ia maua le onosa’i ma le fa’apalepale e fai ma ta’ita’i. E lē tauilo foi le iloa e Mose o le taunu’uga o ta’ita’iga. Peita’i, e le’i suia ai lona onosa’i e ta’ita’i pea le nu’u, e ui ua iloa lona i’uga, e lē taunu’u pe tuvae o ia i Kanana. O isi ta’ita’iga i nei aso, e malosi pe a iloa le tau, ae a iloa e lē maua se tau, ona fa’atalapelo lea ona faia o le ta’ita’iga.

2. **FARAO** – O le ta’ita’iga na iloga ona tala i le sauā o lana ta’ita’iga, a’o pologa ai le nu’u o le Atua i Aikupito. O ana fa’ai’uga ma fa’atonuga e fa’amalie lona mana’o na o ia lava, ae afaina ai le soifua filemu ma le malōlōina lelei o tagata o le nu’u atoa.

A’OA’OGA MAI IA FARAO – E fia ni ta’ita’iga fa’a – Farao o lo’o faia i aso nei e te tau iloaina ma itea i lau va’ai.? O faiga e o’o mai ai le malaia ma le pologa i tagata uma ona o le loto ma’a’a. Ae sili ai ona leaga, o le loto ma’a’a i le Atua Soifua. Ua fa’amanatu mai mo i tatou, ina ia aua lava ne’i tete’e ni a tatou ta’ita’iga i le finagalo o le Atua Soifua.

3. **SAULO** – O le ta’ita’i e tele tu’ua’iga i le lē usita’i i le Atua i le taimi o lana ta’ita’iga a’o avea ma tupu o Isaraelu. Peita’i, na ta’utino lava Tavita ma fa’apea atu, “Afafine o Isaraelu, ia fetagisi outou iā Saulo, sana fa’a’ofu ia te outou i ie mūmū, atoa ma mea fa’afiafia, na ia teuteua o outou ’ofu i auro e fa’amatagofie ai. Aue! Ua maliliu toa, ua maumau ai ‘au’upega o le taua” (2 Samuelu – 1: 24, 27). O upu o le valevale alofa a Tavita, o lo o ta’oto ai le atoaga o le galuega fa’ata’ita’i na faia e Saulo. O le tagata saili malō mo ona tagata. O ia na asaina le gasū o le taeao i faigata o le amataga o ta’ita’iga fa’atupu iā Isaraelu. O le ala lea ua ta’utino ai Tavita, ua maumau ‘au’upega o le taua. I le talitonuga o Tavita, o le ta’ita’iga na asa mai faigata mo lona nu’u. O le oti o Saulo, na oti i le taua. O le fa’aailoga o le tagata finau i lana ta’ita’iga.

A’OA’OGA MAI IA SAULO – E leai lava se ta’ita’iga e ‘asa ma se faletonu, Peita’i, o le itu taua, o le tauivi pea ma faigatā ona o le manatu ia taunu’u i se lelei. O le isi lea mafua’aga o le fa’aletonu o Saulo, o le naunau i se mea lelei, ae ua sopo ai le tuāo’i o ona tiute ma ona nafa fa’atino. E manatu e fa’apenā foi tatou, a’o le a’oa’oga ua maua ai, ia aua le naunau i le i’a, a ia manumanu i le upega.

4. **TAVITA** – O le ta’ita’i matuā lelei i luma o le Atua, ae na iloga lona paū maulalo ina ua tosina lana va’ai i le lalelei o Patesepa le avā a Uria le sā Heti. Na o’o lava ina oti Uria ona o faiga fa’ata’ita’i a Tavita, a o le fa’amoemoe ia maua Patesepa le tama’ita’i ua fa’ananau i ai lona loto. A o ia lava o se ta’ita’i lelei ma iloga lona tula’i mai mo le nu’u.

A’OA’OGA MAI IA TAVITA – E lē moe le fili – E ui lava i le lelei o Tavita, ma tofiga a le Atua sa iā te ia, peita’i, na to’ilalo lava ona o le fili ma ana faiga. O le fa’amanatu lea, ia mata’ala ma ia to’aga e tatalo, auā o le taimi lava e galo ai le Atua, o le taimi foi lea e osofa’ia ai i tatou e le fili.

IA MANATUA AUA NEI GALO -

“O le ta’ita’iga sili i ta’ita’iga uma, o le ta’ita’iga a IESU. O le ta’ita’iga e lē toe fa’amatalaina ua silafia uma . Ae taua pea le fa’amanatu ma taofi pea e tupulaga le a’oa’oga tupito mo tatou uma mai le ta’ita’iga a Iesu, “ia fa’alogo, talia, usita’i, ma fa’atino i lo tatou ola le ta’ita’iga fa’a-Iesu.”

GALUEGA FA’ATINO – Tu’u i le Autalavou le avanoa 15minute e saili ai se tamā mai le Tusi Paia ma sana ta’ita’iga na fai. Ona auaua’i lea e fa’amatala i le mafutaga, ae sili o se a’oa’oga mai le na tamā sa sailiili ai. E leai foi se afaina ae ta’ito’alua pe to’atolu i le vaega pe a toatele le mafutaga, ina ia fa’asaoina ai le taimi.

FA’AI’UGA – O le ta’ita’iga fa’atamā e manuia ma to’ilalo ai foi aiga, nu’u, Ekalesia ma le atunu’u. A fia manuia a tatou ta’ita’iga, fa’amoemoe i le Atua e lē aunoa, ma le malosi o lona mana. E mafai ona avea lou talavou ma ta’ita’i lelei mo lou aiga ma lou nu’u, aemaise o le tou ‘aulotu pe a o’o i o outou taimi i le lumanai? Fai mai le tasi fuaitau faa – peretania, **“The future is now”**

MANUIA LE FA’ASOA O LENEI AFIIFI.



ASO SA – IUNI 22, 2025, “SU’ESU’EGA I LE TUSI PAIA”

MATAUPU – “E ILOA LE LA’AU I ONA FUA”

TUSI FAITAU – MATAIO 7 – 15 – 20

FA’ATOMUAGA – O le si’osi’omaga ma la’au o lo’o ola ai, e iloa gofie le ‘ese’esega o la’au i o latou fua. Peita’i, o le mataupu o lenei afiifi, o lo’o fa’asino tonu i le tagata ma ona uiga fa’aalia i aso uma. E iloa le tagata e a’oa’oina i ana fa’atinoga. E iloa foi le tagata e lē a’oa’oina i upu ma fa’atinoga na te faia.

FESOASOANI MOLE MATAUPU – O le tusi faitau, o se vaega o le lauga a Iesu i luga o le mauga e pei ona amata mai i le mataupu e ono. O le fa ai’uga o le lauga, lea ua talanoa ai Iesu i le la’au ma ona fua, e fa’atusa i ai le tagata amio lelei ma le tagata amio leaga. O lo o manino i le saunoaga a Iesu, e lē mafai e le la’au lelei ona fuaina o ni fua leaga, e fa’apena foi i le la’au leaga, e lē mafai ona ia fuaina ni fua lelei. E i ai le fesili e mafai ona tatou fesiligia ai le saunoaga lenei a le Alii.

1. O ai i latou o lo’o fa’asino i ai la’au leaga ma la’au lelei i le finagalo o Iesu?

LA’AU LEAGA – O la’au leaga, latou te fuaina mai le leaga, o lo’o fa’asino i tagata ua te’ena le finagalo o le Atua i le si’osi’omaga o le galuega a Iesu, e to’atele lava i latou o lo’o tau saili se mea e molia ai Iesu i le tulafono. O tagata taulamalama, o tagata lē alolofa i e vaivai ma e mama’i. O le ‘au Tusiupu ma le ‘au Faresaio i faiga pi’opi’o ma faiga lē amiotonu ua mafatia ai tagata lautele, ma isi amioga ua fa’avasegaina i luma o le Atua.

LA’AU LELEI – A o i latou ua fa’alogologo ma le fa’atuatua, o i latou ia ua fa’asino i ai le la’au lelei. O tagata fa’atuatua latou te olaina le alofa ma faia mea lelei e pei ona finagalo i ai Iesu.

2. E i ai se avanoa e mafai ai e le la’au leaga ona fuaina ni fua e lelei?

O le ta’aviliga masani o le olaga lenei, e lē mafai e se la’au leaga ona ia fuaina o ni fua lelei e pei ona fetalai Iesu. Peita’i, e mafai pe afai e fai i ai se galuega a le faifa’atoaga. Ia lūlū i ai le fa’alelei ‘ele’ele ma teuteu ma fa’asūsū i taimi uma. Ia teuteu ma fa’amatagofie. Afai foi e malosi le la, ia fai se paolo e malu mo le la’au, ina ia suia mai le leaga i le ola lauusi ma fuaina ai ni fua lelei. O le fa’amoemoe lea o Iesu i lana galuega folafola na afio mai ai. Ia suia la’au leaga o le fa’atoaga e fai ma la’au lelei. Peita’i, o le galuega e fuatia i le loto o le la’au – tagata fa’alogologo na te talia ai upu o le ola, ona mautinoa lea ua fua mai i fua lelei. Ae afai e lē loto atu le tagata i upu o le ola ua folafola mai, e mautinoa le fa’auau ai pea ona fua mai i fua leaga. O le i’uga o la’au leaga ma fua pea i fua leaga, o le lia’iina ma lafoa’ina i le afi. E fa’apena le tagata e fa’ama’a’a pea i le finagalo o le Atua, e sau le aso o le fa’amasinoga tonu a le Atua, ona lia’iina lea ma fa’asalaina i le afi.

3. E i ai se avanoa e mafai ai e le la’au lelei ona fuaina mai ai ni fua e leaga?

E fa’apea foi le la’au lelei, ua fetalai Iesu, e lē mafai e le la’au lelei ona ia fuaina ni fua leaga. Peita’i, e iai le taimi e afu ai le la’au lelei ona fa’asolo lea ina leaga ona fua e fuaina mai. A o lea foi le fa’amalosi a Iesu i le ‘au faatuatua. Ia aua nei muta le fa’atuatua. Auā o le taimi foi lenā e mou ese ai le fua lelei, ae fa’asolo ina fuaina o fua leaga.

GALUEGA FA’ATINO –

1. Fa’amata e mafai e lou talavou ona fai ma fai-fa’atoaga lelei e te suia ai nisi talavou po’o la’au o le fa’atoaga a le Atua, ua lē mafai ona fuaina ni fua lelei, ae ua na o fua leaga lava?
2. O le a sau galuega fa’atalavou e fai ina ia tumau ai pea nisi tupulaga lelei i le fua pea o fua lelei?
3. O le a sou taofi, aiseā ua fa’atuputeleina ai le to’atele o tupulaga ma tagata matutua foi ua fiafia pea o latou la’au e fua i fua leaga?

FA’AI’UGA – E leai lava se tagata e manatu e avea ma la’u leaga. Peita’i, e mafai ona tatou o’o i ai, pe afai e galo iā i tatou le Atua. Po o le a lava lo tatou lelei ma le fa’atuatua i le Atua, o le itu aso lava e galo ai le Atua, o le taimi foi lea e o’o ai i tatou i puapuaga e tele ma tatou fuaina ai fua leaga i o tatou olaga. O le la’au leaga e mafai ona avea ma la’au lelei, pe a tumau pea lona lelei, pe a fai e faamaoni i le Atua. Afai o oe o se la’au lelei, to’aga pea e fa’atumauiina lenā lelei ma teuteu atili ma fa’amatagofie ia sili atu i se isi la’asaga o le lelei. Ae afai o lo’o e mafatia i le leaga, fai se suiga lelei e ala i lou fa’atoese, salamō, fo’i loa i le Alii, na te lē te’ena oe, ona fua lea o lou la’au i fua feti’iti’i o le lelei mo le viiga o le Atua.

MALO LE ONOSAI, FA’AFETAI LE FA’AMALOLOS



UPU FA'AFETAI -

MOMOLI TELE ATU LE F'AAFETAI MA LE FA'AMALŌ IĀ OUTOU SUSUGA I TOEAIINA MA FALETUA, SUSUGA I FA'AFEAGAIGA MA FALETUA, AUĀ LE GALUEGA TELE SA FITĀ AI I LENEI 'AFA TAUSAGA MO FANAU MA TUPULAGA. FA'AFETAI LE LAGOLAGO MAI, FA'AMALŌ LE PALE MA LE FA'ATOATO. IA FA'AMANUIA TELE LE ATUA I LO OUTOU SOIFUA GALULUE.

E FIA FA'AMAUINA FOI LE FA'AFETAI TELE IĀ TE OUTOU UMA, SUSUGA I FAIAOGA O LE AOGA ASO SA, MA OFISA O AUTALAVOU. E LĒ MĀMĀ I LO TATOU OFISA NEI LO OUTOU TAUTIGĀ I LE GALUEGA, E ALA I LE LAGOLAGO I LE 'AU FAIGALUEGA I LENEI TAIMI UMI. UA SILAFIA E LE ATUA LO OUTOU AFU UA MALIGI ONA O TUPULAGA MA FANAU A LE EKALLESIA. O LE ATUA NA TE TAUI ATU I ONA LAVA ALA ONA MANUIA MO OUTOU UMA. FA'AFETAI, FA'AFETAI, FA'AFETAI TELE LAVA.

MO TUPULAGA -

MANUIA TELE LE TU'UAGA O LE TAUMAFANAFANA, IA TAUTAUNA LE ATUA I O OUTOU ALA, MANATUA, "IA OLA TAUTUA FA'AMAONI MO KERISO." I TAIMI UMA. ALOLOFA TELE ATU LO TATOU OFISA O A'OA'OGA KERISIANO MO OUTOU UMA TUPULAGA MA FANAU.

TATOU FEILOA'I IA AUKUSO.

////////////////////////////////////

ASO / MASINA	FA'ASOLOGA O MATAUPU	TUSI FAITAU
1. Fepuari 02, 2025	"O le fa'atuatua ma galuega"	Iakopo – 2: 14 – 26.
2. Fepuari 09, 2025	Ia matuā naunau e usita'i i fautuaga lelei	
3. Fepuari 16, 2026	"O le Sapati mo le laueleele"	Levitiko – 25: 1 – 7
4. Fepuari 23, 2025	"Tatou te mapu ma filemu i a'ao o le Atua"	Kenese – 8: 8 – 14.
5. Mati – 02, 2025	"O le Tusi Paia ma faigā palota"	
6. Mati – 09, 2025	"E sauāina le amiotonu ae manuia"	Isaia – 3: 1 - 15
7. Mati – 16, 2025	"O le Tapua'iga fa'ale – Fa'apotopotoga"	
8. Mati – 23, 2025	"O le Agaga Paia o le Atua"	Galuega – 1: 1 - 5
9. Mati – 30, 2025	"O le faitoto'a ua valiina"	Esoto – 12: 22
10. Aperila – 06, 2025	"E leai se tasi e tu fa'amauga i le olaga nei"	
11. Aperila – 13, 2025	"Aiseā na ti'eti'e ai Iesu i le asini, ae lē ti'eti'e i se solofanua" (Aso Sa Laupama)	
12. Aperila – 20, 2025	"O le Alofa Tunoa o le Atua (Aso Sa o le Eseta)	Roma - 5: 1 - 11
13. Aperila – 27, 2025	"Ua oge gataifale o Kalilaia"	Luka – 5: 4 – 11
14. Me 04, 2025	"O Iesu ma le alafau taumatau, o le ofutino, ma le maila e tasi" (Mataio – 5: 39 – 41)	
15. Me 11, 2025	"O ulua'i avefeau o le Talalelei" (Aso Sa o Tina)	Luka - 24: 1 - 12
16. Me 18, 2025	"Mulimuli i lou fetu"	Mataio – 2: 7 - 15
17. Me 25, 2025	"Pau lava o le foa'i a le Atua (sao pe sese)	Fa'afinauga
18. Iuni 01, 2025	" E leai se mea ou te mativa ai"	Salamo - 23
19. Iuni 08, 2025	"E lē o le Agaga o Ienei lalolagi, alo le Agaga o le Atua." (Aso Sa o le Penetekoso)	I Korinito – 2: 1 – 13
20. Iuni 15, 2025	"O ta'ita'iga Fa'atamā (Aso Sa o Tamā)"	
21. Iuni 22, 2025	"E iloa le la'au i ona fua"	Mataio – 7: 15 – 20

MANUIA TELE GASLUEGA O LENEI TAUSAGA I LE MAFUTA MAI O LE AGAGA PAIA O LE ATUA

